

左海文集

左海文集卷九

福州陳壽祺恭甫

謝震傳

謝震字甸男福州候官人宋江東提刑枋得之裔震少喪母隨父宦四川不爲父妾所容卒善事之性亢直多翹人過落落尠合於時至交友有緩急死生以之篤學者古熟三禮治經斷斷持漢學好排擊宋儒鑿空逃虛之說然亦不自著書讀史傳百家之言必實事而求可用旁逮篆隸金石星卜形法醫術靡不通曉舉乾隆五十四年鄉試試禮部屢黜中更憂故三

至京師皆不預試去嘗約閩縣林芳春林一桂甌寧
萬世美等十人倡爲通經復古之業號會所曰殖榭
芳春齒最長爲祭酒震爲職志旣殖榭同人率通籍
登館閣而震終不遇震久羈旅數往來河雒關隴荆
益之間匹馬踟躕周覽古來用兵形勢成敗得失輒
喟然悲吒酒酣縱談覩舉天下山川阨塞畫地成圖
口若波濤衮衮可聽乾隆末自四川歸過漢中謂人
曰終南亘七百餘里連跨數郡秦蜀門戶也守險安
可忽且鄖庸以西夔巫以東巴閬之北武都之南大
山老林蠓螻其間今將吏徂承平而弛控馭不數稔

難其作乎及嘉慶初邪教起襄陽蔓延秦蜀果以南
山爲巢窟朝廷於是即山內置大帥宿重兵改五
郎營爲寧陝鎮事平從經略大臣請令三陞營汛畫
界巡徼每歲會哨提督以十月總兵以春秋二仲震
言皆卒驗初震銳意功名冀有以見用於世抑塞奔
走英華寢衰則閒挾其悟時嫉俗之孤憤寓之於文
章儀曹懷寧汪德鉞儒者也與震友善見其文嘆曰
旬男其古之傷心人乎方震壯時踔厲激蕩志氣若
不可一世然每風雨淒晦煙月靚深徘徊景光歎歔
不自己不知哀樂之何從也久之大挑舉人以教職

用尋補順昌校官困甚將調臺灣遽病脹卒年四十
弟子緝其遺艸爲禮案一卷四書小箋一卷四聖年
譜一卷謝氏家譜一卷詩集一卷

贊曰震長余六歲與余同歲舉於鄉震獨心好余往
震滯京師假館通州嘗刪撮所爲詩百餘篇抵余曰
足下肯憐其志悲其遇而教之耶丁敬禮云後世誰
相知定吾文者使僕身後得題墓碣清詩人謝甸
男之墓於願足矣嗚乎震豈欲以詩人終者哉味其
言乃至深痛無窮也

汪德鉞傳

汪德鉞字崇義安徽懷寧人性孝嘗刲股療母疾以拔貢生舉乾隆五十三年順天鄉試嘉慶元年成進士選庶吉士改禮部精膳司主事遷儀制司員外郎充會典館總纂以書吏繕寫錯誤奪職鄉人為鳩賞以復需次久之貧甚卒於京邸年六十一初大興朱太傅珪巡撫安徽政體寬大君獻書畧曰天子代天治民天之元氣也封疆大吏代天子治民天之雨露霜雪雷霆也霜雪之遏抑也不固雨露之滋生也不茂疾風迅雷之散陰氣也不力和風甘雨之宜

陽氣也亦不暢使吏離慈母之懷侍嚴師之側而吏
不望風惕息盪滌宿弊者未之有也今宜法子產之
治鄭不宜如曹參之治齊宜如蜀相諸葛武侯不宜
如東海相劉寬抑鄭僑諸葛之不同申韓也公稔知
之如强悍之族不黜于鄭游詞巧飾之吏不斥于西
蜀子產豈得為惠人而忠武又何以亞管蕭哉故獬
虎不除麟無以為仁鷹鷂不逐鳳無以為威稂莠荼
藋不薅嘉禾無以為生無賢愚知之公不忍於頭會
箕歛之人而獨忍于纍纍然匍匐入井之赤子邪太
傅善之及

今上親政太傅被召君上書言四事曰輔 威德教
皇子慎用人以舉衆職辨上下以定民志故事曹司
見長官皆長揖後權貴專軸乃易為半跪因仍數十
年君啓座主尚書紀昀爭之以為自古宗社輦由士
大夫氣節植氣節植由庶恥豫廉恥者何不芑苴以
營利達不脅肩諂笑以羞妻妾而已昔人制禮每析
之于毫釐君子守禮亦爭之于微末尚書韙其言卒
復長揖山東巡撫議以肥城邱氏為左邱明後據廣
韻引風俗通證之咨部請立五經博士君議駁曰唐
林寶元和姓纂於邱氏云齊大夫封于營邱支孫以

地為姓左傳有邾大夫邱弱于左氏云齊公族有左
右公子因以為氏後乃出左邱云齊國臨淄縣有左
邱明之後舉左雖左惡為證林寶唐博聞士姓纂邱
獨不用應欽說必證據明白始削之邱氏譜近出去
林氏又千餘年乃反引風俗通為證誤矣案廣韻姓
纂于邱左二氏迴別姓纂以倚相邱明別族今乃依
違二者改易頻煩復以倚相為邱明祖又載漢光武
時裔孫邱堂左氏精舍志跋鄙陋紕繆偽託顯然胡
可信也或謂善善欲長然欲報左氏傳經之功而俾
非種冒承左氏有靈其式憑耶事遂寢其說經曰尚

書惠不惠懋不懋已女惟小子乃服維宏王王當為
大左傳引周書曰惠不惠茂不茂康叔所以服宏大
也此其證毛詩不大聲以色不長夏以革夏楚也革
鞭也書鞭作官刑扑作教刑古以與通此謂聲與色
夏與革耳士冠筮日卦者在左卒筮寫卦筮者執以
示主人書寫皆卦者事執筮示主人皆筮者事士冠
不言筮者文不具耳鄭注以士冠書卦為筮人事特
牲書卦為卦者事誤也士昏親迎北面奠雁再拜稽
首者女父筮于戶西西上右几以先祖之遺禮授人

故也婿拜主人不答者亦假先祖之靈以授之不敢
當其禮也鄭注謂主為授女教氏謂以女在房失其義
矣馬季長注論語以三綱五常解因以文質三統解
損益朱子集註因之然三綱五常定之自天者也非
夏殷先王所叛也不可謂之因且孔子言禮一而已
馬以為五常則益之以仁義知信信如其說曰殷因
於夏之仁義知信周因于殷之仁義知信可乎蓋因
與損益為一事損者損其禮益者益其禮禮也者吉
凶軍賓嘉之謂非指其辭讓之心之為禮之端而言
也董子曰繼治世者其道同繼亂世者其道異湯武

革命故禮亦隨之然革其節目而不能革其大體故
同一始加冠而卑追章甫委貌異其制同一三加而
收嘏弁異其名同一尸而夏立殷坐周旅酬同一降
神而殷先求諸陽周先求諸陰同一牲而異其黑白
赤同一祭而異其心肝同一飲而異其明水醴同一
尊而異其山著犧象乃因風氣之淳澆而有盈縮監
前人之得失而裒益其多寡是聖人之善其因也禮
也者人之隄防也其因與損益亦若是而已故君臣
父子之名不可即名以禮而仁義知信之德不可獨
以禮當之也嘗言君子立身務厲廉恥刻苦自治日

之所為夜必書之揭經書要義撰箴銘自警又言浮
薄以厚藥之躁率以靜藥之傲誕以敬藥之不能精
進病在因循因字銳齋又字三藥未達時隱居其鄉
之雲田坂自謂與俗迕暱我者琴書山水四友也因
撰四一居士傳所著周易義例一卷周易雜卦反對
互圖一卷七經餘記一卷女範一卷銳齋偶筆一卷
日記六卷文鈔六卷古今體詩二卷

同安劉氏家傳

劉先登字二山其先江西玉山人元時有璠者宰同安遂家焉十餘世至夢煜字敦行天植篤至郡縣志有傳先登其仲子也少苦學疾不輟舉乾隆三年鄉試久之選授直隸定興縣知縣縣故西北孔道郵置供億無虛日會

鑾輿西幸所過行幄馳道治

賜一級為政五年除蝗賑水患平反疑獄拒馬河渡復范陽書院禁樵採楊忠愍龍獎縣民翟氏四世雍睦父老呼劉佛子當課最以病自免去送者塞道後四歲奉檄再起仍發直隸即用未行復謝病歸年

八十有九卒

子逢升字南吉幼隨父宦邸盛暑衣帶侍終日夜
誦漏再三下不命之退不退稍長益自厲卧常不帖
席擁被榻上而已舉乾隆五十三年鄉試縣令延主
輪山書院善教誘今總督汪公是時為巡撫訪其學
行下書郡守使尊禮之子弟赴試或垂肩與戒之曰
吾少應郡省試每徒步挾冊且行且誦日走數十里
誦亦數十篇女曹碩遽求安逸耶其儉苦如此初父
先登恆語家人吾平生所為無出敦行公教者惟憲
不違耳諄諄命子孫毋忘祖訓故逢升所以教其子

如其祖父撫從子如子事諸嫂如諸兄每進子姓而
勛之以孝弟持門戶奉祠墓資婚葬憫然如不及年
五十卒妻洪氏名家女食貧色養得舅姑歡子宗成
嘉慶十三年舉於鄉好學世其家

論曰定興治行庶幾古循吏惜未竟其用優游田里
二十年病革諸子請遺訓曰敬慎其躋壽者有由
也南吉汲汲承先志年僅及艾所以遺其澤於後昆
者未有止也余不獲覩定興父子然獲交於宗成以
知其祖若父家法之美於戲其可感也哉

誥封中憲大夫兵部武選司貢外郎晉 贈資政大
夫軍功加三品銜兵馬司正指揮加四級文巖

潘君傳

君氏潘諱振承字遜賢一字文巖泉州同安人早孤
家貧附估舶泛海遇颶風飄蕩不知去所惟念母日
夕哀號忽風轉泊番禺遂止焉踰數日舟再發復遇
風覆溺獨君已登陸免所齎貨適騰貴獲利倍人以
為孝思之感由是以商雄於嶺海間久之以貲選用
兵馬司指揮養母不就母卒與父德興合葬縣之文
圃山之麓卒不仕妻黃氏先卒葬先龍之西虛左壙

自為壽藏勒石示子孫曰毋忘首邱也治家儉勤率
夙興晚寐徧課家人事至老不輟子弟婦女燕居不
得衣羅紈冬布夏葛而已營大小宗祠置祭田友慶
群弟同曾祖以下五房歲時寄貲故土分贍之調其
婚娶喪葬禮鄉黨恤羈旅嘗代友人償公帑釋其獄
廣州飢捐米萬石助賑全活甚衆會大疫飢民無以
斂施棺五千餘具修邑中華園書院講堂及紫陽祠
增餐錢供遠近來學者乾隆中剿金川首助餉凱
奏叙軍功 予三品銜洎平臺灣輸効益力其勇
于為義多此類卒年七十有四嘉慶三年自嶺南歸

葬其鄉如君志子七人皆有位于朝孫多登科第
成名

貞烈方氏傳

方氏河南開封人年十六河南齊鯤納為妾守有
咯血疾方謹侍無怨色善事嫡隨守返閩又甚得姑
歡數年不字守尋病平方大慟竊吞鉛粉中毒家人
救之不死委頓累旬日自是省飲食寡言笑嘗語人
曰再暮之內吾必行吾志若等毋吾阻也踰歲守將
葬果乘夜雉經死年二十有一

楊實庭家傳

君諱名標字輝世一字實庭先世由福清西井遷福州遂爲候官人父肇修縣學諸生早卒君生四歲而孤長奉母力學從進士卓道翼游棋齋深器之肄業嵩山書院每試輒冠其曹無何伯兄歿家益貧孤孀待以舉火遂輟業遊乍浦爲人殖貨以其贏完諸從子婚娶赴人之急傾囊無吝色性凝重寡言笑飲酒至一石不亂晚歸里嘉慶三年七月卒年五十有五子際熙際春嘉慶二十五年進士刑部河南司主事是年請於

朝贈君奉直大夫

晉贈奉政大夫

如其官

贊曰君累世爲儒績學二十年不遇於時而刑部竟以令名揚顯非所謂鬱積而光者與君在浙西久卒後十年刑部計偕過其舊遊地故老猶道其厚德懿行有欷歔泣下者然則君之所以貽穀於後人豈有艾哉吾以刑部之賢卜之也

唐御史大夫持節都督福建泉州汀漳五州事領

觀察處置防禦等使李成公傳

李椅唐宗室蜀王湛之六世孫代宗之諸父也孝慈忠敬文而強力治王氏易左氏春秋居處執事著書屬詞非聖賢軌躅不踐也天寶三載應選部為安陽縣尉中興後遷御史尚書郎諫議大夫給事中十餘年周歷三臺家貧不樂清近求為京兆少尹無何出守宏農移華州刺史兼御史中丞近安遠來天子以為才大赫七年冬十一月代李承昭為福州刺史加御史大夫持節都督福建泉州汀漳五州事領觀察處

置防禦等使福州廟學舊在州西北一里椅未及下車禮先聖先師退而歎堂室湫隘移其地城南考類宮之制而大之躬率群吏之稍食與贖刑之餘羨以備其資先師寢廟七十子之像在東序講堂書室函丈之席在西序齒胄之位列於廊廡之左右始補生徒三十弦誦必時每歲二月上丁釋菜先三日齋戒肆禮命博士率胄子脩祝嘏陳祭典及期釁器用幣脩其俎豆尊罍大昕鼓篋褒衣方屨登降以齒是日舉學士之版視其藝之上下審問慎思使知不足講論以勗之八月上丁禮如初歲終博士以遜業之勤

情精麤告斂其才者進其等而貢之於禮部將進必
以鄉飲酒之禮禮之賓主三揖受爵於兩壺之間堂
下樂作歌以發德康鳴諸詩以將厚意由是海濱榮
之以不學為恥教達功倍三年而比屋為儒俊造如
林閩越舊風機巧剽輕資產貸利與巴蜀埒富號為
難治椅考禮正刑頒賦遣役必齊其勞逸視年豐耗
量入制用削去事之煩苛與法之掊克者吏不奉職
民不帥教則懲以薄刑俾寢遷善初嶺南哥舒晃反
椅命將帥師與鍾陵軍會先拔循潮二州以援番禺
推誠誓衆士皆奮勇五嶺遂平十年秋九月卒於位

判官膳部員外郎兼侍御史安定皇甫政殿中侍御
史潁川韓贄監察御史河南長孫繪率門人部從事
州佐縣尹等以常州刺史獨孤及嘗同諫垣屬譔德
政刺之石十二年太常議以椅尊教勸學德洽荒服
奏謚曰成詔贈禮部尚書二子充信州刺史充子承
構次承緒南陽令承規六局丞承祚稷山尉

論曰世謂閩學倡常袞不知袞之前立黌序厲風俗
自李椅已然矣而兩唐史皆無傳它記載椅或為錡
宋王象之輿地紀勝辨之曰李錡元和二年為潤州
節度使距大秣七八十年不應合為一人攷獨孤及

學記作李椅則非元和之李錡矣傳曰盛德宜百世
祀閩自永嘉衣冠南渡儒學猶未昌椅勗治有造於
士民甚鉅而烝嘗闕如非所以崇美報救膚功也余
是以掇唐書世系表與毘陵集福州都督府新學碑
銘紀述良政以恢其傳世有志於表賢吏者亟以椅
與常相並祀類宮庶乎宏大道播德馨而塞民心者
乎

隱屏山人傳

隱屏山人者養拙之遺老非沈冥之逸民也山人雅慕武夷佳山水老而不能遊臆想五曲之大小隱屏往紫陽精舍在焉廼取以自號也山人幼穎異六歲從周立巖先生遊所謂梅社七子者也先生喜之每客至輒令背誦所授書以誇之既而從大父父受業又遊鄉賢考功孟先生之門先生目以國士少稍事詞章壯治經義小學及古文詞溯游於六藝齟齬於馬班韓柳歐蘇而下逮震川孺染於當世鉅人通儒賢士大夫其學用益進著書數種自謂非其至也性

直而介嫉惡嚴與時寡合有所不可雖朋舊權貴必
力爭之不飲不奕不擣蒲唯篤嗜經籍生平所聚幾
八萬卷舉唐杜暹鬻及借人為不孝之語示後人毋
失初山人嘗通籍詞垣請急歸今相國儀徵公時巡
撫浙江留之主講敷文所識拔者後皆任大藩矣兼
課詁經精舍生與大府間月迭主之儀徵公則命辨
義例舉高才生分纂羣經古義為經郭數百卷晚里
居教授清源整鬚疲於文字之役然皇皇然表揚先
詰汲引後進里黨義舉多為之領袖文昌之祠火神
之廟大成殿兩廡之築重垣明倫堂右之闢通衢敬

節堂之恤糈米廩之施賑莫不偕同志首倡其議貢
院校士之場西湖東湖木蘭陂之水利則當軸時與
咨訪上下議論力贊其成而於貢院尤心瘁土石飯
甕之屬覈省緡錢一千萬賁有奇夫匠數百人立章
條嚴程限纖悉不遺謂人曰此所謂陰以兵法部勒
者也六閱月而號舍成十之八其於桑梓利弊蒿目
癢心往往直陳於大吏冀獲挽救雖間櫻逆耳之怒
弗恤也以為苟身晦而道少伸亦急病讓夷之義也
然亦以是積憂恚生病胎矣其教士以崇廉恥踐禮
法研經術為尚士始畏束縛漸而安之其左右函文

及掇巍科登仕版者久之悅服不能忘然在官取士
徒以文猶以稂莠未盡芟為憾其戒子弟諄諄以慎
取舍依忠厚而文藝其末也適閩中重纂通志當軸
延山人總其事山人舉賢分任之逾三年病甚猶力
疾訂改山川稿本不輟在輦下十年恬然寡交遊人
亦憚其方不之睚獨座師數公善視之異於他弟子
同歲生數人知而愛之相待如昆弟有貴人欲羅致
之門下處以要津山人峻卻焉弗屑也中亦頗被公
卿論薦京察書上考擬倍 內廷供奉皆卒不見用
再舉臺職一 記名而已預脩 國史甫屬草以憂

去然嘗奉使衡文於嶺南中州分校南宮拒請託絕
投謁得士多知名今之位給諫列曹郎莅監司臈方
面者蓋十數人山人素愛其師孟考功之詩曰四十
歸田有二親以為吾宅不逮吾師庶幾退栖之勇可
自決也及丁外艱年適四十山人歎曰吾百不逮吾
師遠矣服闋自傷祿不逮親因乞養母不出凡一紀
母卒大臣有以山人密薦於朝者山人聞之曰吾
豈易誓墓之志者哉卒不出山人曩有長句云短髮
蕭騷尚未班山人何日卧青山十年更約巖花綠祇
恐青山亦改顏足以知其志矣

孝節處士臧君墓表

君諱禮堂字和貴常州武進人也高祖琳明經通古
學為太原閭若璩所重學者宗之君負曾閔之淳性
抱圭璧之貞行動符仁義言軌忠信事父繼宏久瘡
惡寒身潛溫被居喪如禮哀慕羸頓母章危疾刲股
和藥私禱獄祠減齒延壽神感至誠天聽如響是以
醴粹沐飲乎州閭德音風動乎圭組娶婦之夕豫撰
誠辭女僕莊誦乃命合卺卒能執義制愛叱狗禁聲
少從伯兄庸學事之如師然有過輒諫翼翼乎孝弟
之言綽然變醴砥鈍者也擅稽六藝討論蒼雅觚字

曲聲發疑正讀儀徵阮侍郎聘君纂輯經詁又著古
今孝子孝婦傳說文解字經考南宋石經考愛日居
筆記總數百卷河圖曰孝順二親得算二千天司錄
所表事賜箕中功豈叢蘭敗風生促顏冉春秋三十
以嘉慶十年閏六月己酉病卒庸聞喪京師第泗酷
慟旁采儒議私謚之曰孝節余交於庸數聞君之賢
願以弦韋為贄者久矣無期邂逅黃鳥增哀以為荆
卞之寶豈抱厥能悔膏桂之材非委灰可銷遂勒銘
表墓旌厥令聞其詞曰

於戲臧君肫肫其仁苦節而甘樂存事親孝乎惟孝

達天盡人勤味道腴聞然席珍文為士範德為國寶
竟天天年安贖百身傷哉魂氣尚戀昏晨萬古愛日
照茲佳閨

皇清誥授光祿大夫 經筵講官 太子大傅 體

仁閣大學士管理工部兼翰林院掌院學士 贈太

傅大興朱文正公神道碑文代

嘉慶十有一年冬十有二月甲戌朔越五日戊寅大

學士大興朱公薨春秋七十有六

天子震悼 賜襚 賜賻追贈太傅祀賢良祠

賜諡文正翼日

乘輿臨奠慟哭賦抒痛詩越四日

命皇次子代設饌醴及殯 命慶郡王詣邸裨送

戊戌葬我文正公於西山呂邨之阡與陳夫人同兆

禮也公之孤錫經既敬立

賜碑於墓遂致書公

門下士某請表神道嗚乎公以文學受知

高宗而為

今皇帝師

兩朝一德乎嘉至神其造膝前席丹青於錄圖讒鼎
之側喉舌於金椎玉鏡之間者不可得而詳也其經
德秉哲為虞夏之女聽女明兼儔胖之遺愛遺直者
乃可得而述也公諱珪字石君號南厓先世浙江蕭
山人曾祖必名祖登俊知長陽縣有惠政復知珙縣
內遷中書科中書考文炳始籍順天大興知藍屋縣

除無田浮糧且萬家陝人賴之公以神童連擢高第
與叔兄筠齊名通籍翰林再更大考累踐華資出入
極地為糧驛道一按察使三布政使一學政二巡撫
三總督一翰林侍講一學士二少詹事內閣學士吏
禮侍郎左都御史吏戶尚書各一兵部尚書二管理
工部一 經筵講官 太子少保二掌院學士 太
子太傅協辦大學士 體仁閣大學士各一河南福
建江南考官各一會試同考官二總裁三殿試讀卷
官二乾隆四十一年還自山西行省
高宗以公貞良方幅

命傳

今上發揮

聖智緝熙天光嘗進万箴曰養心曰

敬身曰勤民曰虛已曰致誠每違 承華輒叨

手札委曲綢繆家人恩禮其後緝為寶軸百三十有

九件恭納 廣內值 石渠臨制雲臺入對

先帝敷巾机槃孟之訓公亦講尹誥說命之篇

天心愉悅頌語

上曰此汝師傅講說最高授安徽巡撫

謂軍機大臣曰朕今日所擢得人嘉慶元年授兩廣
總督將相公尋以治安南艇盜緩左遷復為安徽巡

撫四年正月

上在諒闇首召公還道中上疏曰臣聞天子之孝不以毀形滅性為奇而以繼志述事為大親政伊始遠聽近瞻默運乾綱霧施渙歸陽剛之氣如日重光惻怛之仁無幽不浹孜孜以上天之心為心

祖考之志為志思修身嚴誠欺之介於觀人辨義利之防君心正而四維張朝廷清而九牧肅身先節儉崇獎清廉萬物昭蘓天佑民順則盜賊不足平而財用不匱阜也惟願

陛下恒久不忘堯舜自任之心臣敢不隨時勉盡仁義事君之道是時

上方未明求衣倚公如棟不數年卒相公公見

朝廷捐金沉珠損上益下而軍後煩耗彙謀補苴故毅然以黜抑言利為先務居戶部日江南大吏議漕請加上江贈銀下江耗米章下省皆畫諾矣公獨奮筆駁糾以為按較舊徵數實逾倍漕政未清民力先病奏可於是江淮無漕患五年春長蘆鹽政請增鹽價公首駁之以為比年蠲緩商力漸息故事鹽稅以錢易銀錢賤或量增鹽價項錢已貴不可議增奏可

於是畿輔無鹽患夏廣東布政司請升賦沙田視民
田上中二則公又駁之以為濱海淤洲朝溢夕減令
甲科賦至輕以招闢墾否則輸納必困民將自免奏
可於是海南無沙田患九年冬倉場侍郎請豫徵民
稅四五十倍准作義監生賜復終身公又駁之以為
名乖實傷甚於枉尋直尺奏可於是人知法制定而
名器重凡累駁議手草存省中公之持重爭大體畧
如此其苞淳也仁義甘於芻豢忠信寶於金玉山川
在抱桃李不言天球赤玉國之寶鎮慶雲景星天無
濁氛少失恃養於庶祖母李事之如母祿養無棚棘

之傷喪哀有蓼莪之廢恭兄而旦暮叅問睦族而號
獨波及閨門友悌人無閒言其綴學也壺與先聖笙
簧百家探奄中之隆簡餐東杼之祕寶遇 國有大
慶祝釐獻愷辟雍巡守之儀驅染河海吐納嵩華
先帝諷相如之文覽崔駰之頌未嘗不撫華塞寶壯
其瓌璋數

命 皇子 皇孫錄副陳設文集及奏御之作八卷
已刻者知足齋詩集二十卷

今上賜詩為序其砥節也身無奇衣室無嬖侍宦五
十年寒素同檢按察福建時海澄公黃仕簡劾置吏

受賂洋商 朝遣尚書舒赫德侍郎裘曰修治之惟
公不染當路傾風及藩山西撫安徽廣東府藏關市
天下脂膏未嘗受山陰之一錢愛黎陽之一璞是以
清白可遺祭醑無所

王步菴止盡然傷悲其賦政也清淨循黃老優緩近
寬霸翬翬然求與所部去奢從儉克已勤民六計斯
察百城咸勸其有水旱飢饉蠲業振贍奔走勞徠腹
我邦人曷不衆母其謚刑也於閩治偽官逆書獄於
楚治聚衆獄於粵治海盜獄皆不為繳繞多所全活
丹筆無枉黃沙幾室是以觀里端之籍而惡子懼思

菱舍之仁而甘棠愛其造士引賢也慎湛於蘭茝屏
繡於輦輓見一善則揚眉遇一才則扼腕瞻山淵而
識珠璞被咳唾而生毛羽試四五百人數日便決
房暉遠之敏焉條七十二事古學遂行有謝文儀之
功焉嘗謂為國莫重得人事君莫大薦士故推轂長
者抽拔庶吏前後表舉口薦遂登臺閣擁節旌負聲
才望者不可一二數先是公隆坎傷左膝

上遣醫視使者存問八九至去年復病曰乞休

上慰勞不許

賜杖

賜輿病篤給假居第易

簣前三日作詩二章曰芻豢鳴乎可謂忠愛終始矣

公感

兩朝眷寵職在論道閭閻惻惻動出至誠然而入則告謨出不言政天下想聞風采求多於公意其儒服醞藉蹢蹢雞鵲而已比卒後

上再下詔褒公正直曰其所陳說無非唐虞三代之言又流涕謂群臣曰師傅每言多寬大然後知公所
以朕肱

堯舜甄陶周召陰福天下施於無窮非

聖人孰能鑒公之微耶清興以來公卿大臣謚文正者睢州諸城及公三人而已舊學龐臣道豐遇渥

蓋莫若公之盛焉其咨度禮制竊謂闕次第賚予
思私門屬之籍政事之蹟冊誅之詞則紀諸國史家
牒乃若甄綜言行近慰後昆因極之思遠照綿世固
門人小子事也嗟我宿德如何勿銘銘曰
於戲我公五辰陽春九州伊維繩中煬和體大物博
鬱為時棟尊為

帝師

前聖

後聖

股肱是毗公之淳厚

純皇信之曰朕得人擢之方鎮泰山出雲雨人不知
餒者得哺寒者得衣公之簡易吾

君親之

純皇卜甌遺於朕身子弼予迪三代唐虞但覺嫵媚
皤皤鬢鬢公翔瀛洲萬篇琳琅天下譽公謂公文人
公據槐鼎禕隋垂紳天下訾公謂公具臣公究叅同
黃庭金巾有詔公者僊佛前身詔豈公好譽豈公校
譽豈公知我求諸道蟲沒夙夜憂國忘老上質於天
且奭允蹈天不愁遺奪公猶早謹論無聞

帝心則悼生榮死哀尸祝其報高山景行永睎堂奧

大清建威將軍浙江提督總兵官追封三等壯烈伯
忠毅李公神道碑文

嘉慶十二年冬十二月二十有五江浙提督李公
帥師勦海盜死之事聞

上震悼 詔追封三等壯烈伯予世襲謚忠毅給
喪事命福建巡撫往迎其喪攝奠建祠其縣數

勅水師將士為公復仇 恩禮篤異動天下越明
年九月葬公同安坪邊山之原公女夫宣波同知陳
大琮來 京師請文於碑壽祺公鄉人且史官也謹
次功狀之實以昭示來世叙曰

公諱長庚字超人一字西巖泉州同安人曾祖思拔
祖宗德父希岍寄籍彰化縣學生三世贈皆如公官
公於兄弟次三幼倜儻異常稍長習騎射慨然有當
世志弱冠以武學生舉乾隆三十五年鄉試明年成
進士授藍翎侍衛四十一年出為浙江衢州都司擢
提標左營遊擊遷太平叅將再遷樂清副將林爽文
之亂檄入閩權海壇鎮總兵所轄南日湄洲故盜藪
公至捕除之會隣民被劫誤指海壇坐削職還歸散
家財募鄉勇率子弟操舟入海擒盜首從數十復擒
盜大咤公自是有致命之志矣頃之郡王福文襄定

臺灣還訪水師將才禮異公公慷慨請曰長庶破家
為國舟及軍食軍械一不資官惟火藥非私家物願
便宜得調文襄許之初閩盜林明灼等入浙海戕一
叅將吏莫能捕以屬公不三月皆獲奏起遊擊五十
五年權銅山營叅將後四歲補海壇右營遊擊仍權
銅山事六十年安南艇盜闌入閩傍近驟駭公率戰
艦八擊之象嶼追北及三澎賊來撲舟師未集麾兵
士急伏舫中候賊礮盡突過其東發一礮殲之日
暮望數艇踵至今列艦銜艦迤若長蛇比曉東西迭
轉鬥大挫之

今上即位之二年由銅山叅將擢守澎湖副將未行
遷浙江定海鎮總兵定海更盜患嬰城守公條上緝
捕事於總督故大學士書麟多施行於是攻盜衢港
北越山東登萊又攻盜普陀洋又攻盜潭頭斬獲多
當是時鳳尾群盜誘夷艇百餘踞浙江島澳而巨盜
蔡牽林阿金等名號以數十舶交海中當事者特急
艇患日夜程督公乃擊之溫州三盤澳還拔他將之
被圍者鋒銳甚賊宵遁南追至竹嶼過粵閩之交甲
子洋乃返

上聞慰諭曰李長庚素勇追勦力然風濤險阻稍持

重不可輕進又

誠總督王德曰李長庚為水師

傑出宜用於要處莫令往返奔波徒勞無益也公致書提督蒼保大畧謂定海黃巖温州三鎮宜更抽戰船專督帥假便宜勵賞罰加口糧足薪米稽要隘斷火藥遏糴汲益募丁壯增調水兵稍變通成例權利害而勿惜小費其言皆中機要五年擊賊功最

賜花翎夷艇大入浙江巡撫阮元奏以公總領水師遂申軍約別徽幟嚴號令明進退疾徐之節曰吾孰水戰不如法不可欺也夏扼夷盜於松門颶風作覆其艇幾盡獻俘千磔偽侯倫貴利自是夷盜不復踐

浙海他土盜亦寢熾而蔡牽擾閩海劇張其冬公南下翦水澳盜及牽黨六年冬授福建水師提督尋調浙江九年秋 命公為閩浙水師總統温州海壇二鎮為左右翼專捕牽公議賊略船於商船高大仰攻不便當禁海商毋擅造巨舶巨船毋出口賊所掠止千斛之舟乃無能為矣又自剗火攻船頗仿明人子母連環船法十年夷艇挾群盜朱潰窺金廈漳泉戒嚴牽因入淡水迫臺灣復授公福建水師提督出廈門牽引去仍調浙江其秋詔書巡撫清安泰曰蔡牽有船八九十而長庚所統兵船僅相抵浙江尚有邱

搭小肥賓等盜船三四十而三鎮兵船亦僅相抵自
揣兵力猶未足勝賊用兵之道知彼知己謀出萬全
長庚自督府奏定勒限一年以來趨蹈艱險橫戈直
前出入死生徒勞無成者緣閩浙洋面三千餘里所
在兵力單與祇恃長庚一軍往來逐捕碩肩失股賊
反以逸待勞前奉

中旨勿事尾追今日之病實

在於此竊謂兩省宜各厚集鸛鷁隸之兩提督使不
分畛域首尾策應勿予賊暇庶少有豸公自以總兵
討牽歲餘東擊之南盤掩之白犬洋敗之旗頭至東
霍山乘勝至盡山以提督二歲乘之象山東薄之東

滬威之三沙北躡之南鹿手鎗之浮鷹以總統踰三
歲邀於馬蹟東及於黃壠轟之賊復自淡水北覆之
青龍港擣之斗米洋戰三晝夜東燭之臺灣洲尾焚
其舟數十北走而東蹶之張坑掀商艘出虜者復北
折而南克之調班洋合諸鎮兵圍之漁山再踣之竿
塘破之三盤賊東走逐之東湧反而北又竄而南趾
之廣東大星嶼凡斬首八十餘級殪禽數千人得賊
從子一人頭目十餘人俘器械礮火萬計

上知公不遺餘力且功簿無虛飾累

詔嘉之公

追牽三沙也賊食盡蓬纜戰具皆敗乃遣黨詐乞降

督府督府不虞也輒遣吏招撫而飛檄趣舟師入倚
公勿動賊以閒繕備揚颿去牽之圍臺灣也陷鳳山
據洲尾鑿巨舟塞鹿耳門阻外援結奸民萬餘人大
掠公令扼隘口遣將遠出其腹背夾攻連破之已而
賊乘潮從北汕逸事聞奪翎頂而公固逆知港道遼
濶賊衆我寡嘗從督府乞濟師不時應故失牽漁山
之役賊瓦石火箭如雨公力戰被數創當是時總督
王德以罪謫戍邊代者曰銜公構蜚語還劾公而巡
撫清安泰訟公戰功章尋至 詔復公冠頂而切
責劾者大星嶼之役斷賊舟大桅燬其蓬圍急而公

舟亦摧於浪粵援絕故止

上聞切責粵帥叙公功其歲與粵帥勦他盜竣還浙江請暫理軍政

上不許遽行與家人訣曰吾不滅賊誓不返矣於是合金門福寧二鎮兵南擊牽及之廣東黑水洋賊才三舟矣火攻船乘風絙其艚公奮欲登者三幾獲牽俄風大起水立舟中皆傾眩飛礮中咽及額是日日具殞垂絕猶左手持刀右執盾目怒視如生時公天性知兵尤長水軍衽颶濤顚霜電祖鋒鏑身大小百餘戰所向風靡賊私相戒曰不畏千萬兵但畏李長

庚其顰服如此天下知與不知皆以為今之頗牧然
所與同心者阮公清公而已它督部多不相中驟之
掣之齟齬之提孤軍奔命四涉萬里徃徃客主不相
接髮凋齒豁卒罹鱷悲已然而公將兵在外十數
年

上未嘗識公面獨排箕舌洗篋書始終倚公如長城
其生也愛之其死也哀之蓋古名將不易得之於其
君天下又以感公之遭也或謂以公之勇功隲旦夕
賊罪巨於海而網數漏何也豈天欲俾公盡瘁以彰
忠烈而後已耶公卒踰年提督王得祿邱良功竟以

閩浙舟師斃牽海上總兵許松年亦已斃賊朱潰潰
弟渥牽義子小仁先後舉黨降然則

天子之威德公之英靈與文武吏士之所以為公雪
憤者皆可知矣昔漢滅蜀追念來歙越雋夷降賜岑
彭家晉平吳策告羊祜廟唐掃蕩河洛原功張許繪
形凌煙今公功方百世祀天下無一日不思公公何
恨哉公所至嘗脩學校賑飢施棺置義塚善拊吏士
今大帥得祿松年之屬皆公所薦拔蓋又仁智儒將
也生乾隆十五年四月二十五日春秋五十八無子
養子廷駒武舉人早卒聞於朝以所撫同姓子廷

鉦嗣嚴爵銘曰

茫茫大瀛寔生蛟鼉去來閃屍血人於波

天子命我樓船戕戕翦此朝夕齒我天戈雷砰霆激
奔駭妖魄乘風簸濤因而反辭黃頭之軍南北寡援
蒼兕蒼兕觸涉險難宵蟲十霜飢不暇餐志業未竟
先摧師于隴西殲虜昆邪恐亡新息介介壺頭卒僵
公知國恩安知福禍惟

帝念忠報勲優大鼓輦琴瑟聽之立懦登于明堂功
宗曰可

皇清敕授文林郎浙江試用知縣約齋林君墓志銘
君林氏諱啓泰字佑垂號約齋福州候官人余同年
生也先世居福清東潘徙郡城祖父治生有弟五人
君獨力於學舉乾隆五十四年鄉試嘉慶六年挑選
知縣分發山東以親老改浙江試用甫三月以母憂
去服闋有勸行者君私謂子弟曰鄉吾所以捧檄欲
博官誥慰祖父辛勤耳今吾母棄養引憾無極一誤
豈容再誤耶言已淚下由是不復仕終父喪齒既及
艾痺於家事不欲紛子弟讀書之志不數歲子士煥
第進士而君竟病卒君性敦慤每應事平心揆理自

考察甚審善任恤親故余嘗僂指同年中束脩莫如
君者嗟乎自余及君歌鹿鳴以來二十有餘年矣交
游凋落如墜雲飄雨之相續幸而成名通籍者往往
朝榮而夕萎不幸而伏死牖下者蓋不可勝數而侯
官謝教諭震惠安曾君欽海澄黃君元規學術行誼
尤吾黨之干城願皆不得志於時以逝及余奉先大
夫諱還自京師與君無幾相見方思引君為同志以
相勗勉於脩己安人之道而不圖君之遽隕也嗚乎
人生如寄耳二十餘年之中人事之變如此其繁天
道之降福如此其嗇也況余憂患餘生雖委心於灰

槁能不痛哉能不痛哉君卒以嘉慶十六年四月二十
二日春秋五十有八夫人張氏前卒生士煥士奉舉
人明年進士即用山西知縣繼室夫人陳氏生士貫
士駿士楨女子五適人四少者始字士煥娶劉氏生
徠松碧梧續娶程氏生丹陽履綏妾陳氏生捷南士
貫娶吳氏生時暘培根士駿娶陳氏生達鴻士楨後
叔父女孫五以十七年十一月十二日辛巳葬君西
郊外隆進山祖塋之側與張夫人同兆禮也其孤士
煥來請銘銘曰

恂恂於室行捨華孝養乃無苞栩嗟一經教成騰青

霞歟身雖瘁肥歟家千里之足蕃渥洼青山虹氣蟠
龍蛇安君體魄靈所嘉平生篤好匪幽遐為君雞酒
當過車

皇清勅封文林郎石屏楊公改葬墓表并銘

嘉慶十有八年夏知彰化縣事楊君淦泉將返雲南
改葬厥考文林公屬其同歲生陳壽祺表墓淦泉博
學偉於文曉天文圖緯通青烏之術比余為先奉直
卜藏寔有日矣淦泉馳視之弗之善也則親為擇穴
數數走郊原犯炎暑履岡阜不自謂勞其愛余若昆
弟施於余之先人若此則所以自為其先慎可知也
先是歲癸亥葬文林公石屏之北麓雅容山去祖墓
遠後三歲淦泉令於閩七年嘗欲遷諸蓮花池先塋
之南未遑及也淦泉以清疆為閩六十二縣最兩府

重之然在南平幾挂吏議徙海外母太孺人不得偕
其所治民夷錯糅惴惴恐干戾乃乞養歸大吏惜其
才力疏留且請調同安格於例卒不果而淦泉怡然
喜遂其志且獲謀葬事也或言淦泉仕宦蹭蹬不得
志其改卜吉壤蓋欲資地氣以拯之余曰否否淦泉
其非委休咎於宅地之謂也夫天下親民之官莫重
於縣令縣令得其人天下莫不治今之視縣令也太
輕而繩之也太密視之太輕則士無慎名器之思而
垢汙喪恥之徒出繩之太密則人有逃禍譴之慮而
苟安徼倖之習滋其不肖者蓋亦未嘗不獲容矣其

賢者馬犁而鞭筭之功不尺咫過若邱山雖有宓國
西門之行能不躋且僨幸矣安在其得志也如是而
謂地氣使然信乎否耶自古名公鉅人由縣令起不
可勝數近世平湖陸清獻高安朱文端海寧楊自西
即墨郭華野諸君子皆始踞百里之任終建冠時之
勲彼豈皆乞靈於邱隴之間而後戴高爵顯大名哉
毋亦存乎人之自為以聽天之所命而已然則淦泉
其非委休咎於宅地之謂也楊氏先世自明洪武中
有清一者從西平王沐英平雲南家於建水四世至
楨遷石屏九世祖開泰天啓中官鎮江府海防同知

祀鄉賢曾祖以下咸齒於庠世有宿德文林公治家
嚴遇族鄙有禮家無五畝田自守泊然淦泉莅官廉
取舍崇教化省徭役慎刑罰公之訓也公十三試而
補州諸生又六舉而不售乃卒食其報於淦泉然其
所鬱積而發越者固未有艾今淦泉齒始強太孺人
始及中壽雖歸田安知

朝廷他日不旦暮徵召俾崛起功名如平湖高安等
地氣其能囿之哉即不然使淦泉山林長往入侍尸
饗之節出親墟墓之哀君子所求乎孝弟者在是祖
宗之所以無憾乎子孫者在是雖三公之貴奚易焉

吾知文林公之靈之樂之也文林公諱遇春字步元
嘗就養清平宮舍踰兩月以疾卒七年三月二十日
也春秋五十有五勅封文林郎翰林院庶吉士有文
三卷詩四卷考溪廬江府訓導妣邢孺人繼妣劉孺
人公所生也配鄭孺人前卒繼室張孺人生子一桂
森乾隆五十七年舉人嘉慶四年進士翰林院庶吉士改
貴州清平令歷福建南平彰化十二年鄉試同考官署
臺灣北路理番同知娶許氏女子子一壻曰舉人王
際泰孫一集鷗幼適室某氏出女孫二皆許字銘曰
戔戔石屏高雲孕青耕禮耕學苗畬一經火鬱而灼

川湫而泓潛德所蓄哲人挺生觥觥神君貽厥令名
雅容之山閉其元扃蓮池之南是康佳城千秋福基
視吾此銘

皇清誥授朝議大夫戶部江西司蕪山東司主事翰林院庶吉士晉封中憲大夫工部營繕司員外郎薩君墓志銘

古所謂君子之富豈非人情之所難哉士大夫出不能為泰山之雲霞則孳孳埽鬻與駟僧較錙銖不肯落一毛以利桑梓滔滔皆是也若漢樊重蜀許靖元魏盧度世隋李士謙其綱紀門戶瞻矜窮乏並被褒前史垂勸後世然亦不數數見也吾鄉往數十年有仙游徐萬寶同安潘振承咸輕財尚義見稱於雷翠庭蔡文恭二公今則鮮有能繼其躅者也余姻薩君

露蕭自其祖父習猗頓業百有餘年余少時即聞君
考濠梁公好施也君性孝友與人忠信其在戶曹
也郎署例有餐錢人歲得數百金君悉留以資京察
之清貧者不足則捐貲以濟同郡之謁選及與計偕
者多館於君邸數常居會館之半鄉宦某逼逋負將
以身殉君偵知其情傾囊助之解其厄是時已有急
病讓夷之風矣及丁濠梁公憂歸居無何伯兄與太
夫人相繼卽世服闋於是君愀然無宦情且念子姓
少食指餘千親故待以舉火數百家曰不就職專治
畝笑從子既長則分祖遺及伯兄手勑業歸之而鹽

政日敝左提右挈所代承課額不下數十萬金推惠
內外老者幼者鰥者嫠者孤者疾者死者貧無以嫁
娶斂埋者族戚之月需錢米者士子之赴省試禮部
試者親以逋親友以逋友徃徃無半面之識莫不給
求推解若旱暵之遇甘雨自舟人哨丁臧獲乳媪以
及百工行賈之受役於其門者人人樂得其欲以去
林素州其寡先與君同部相善卒官江西家甚貧子
又天亡君乃娶其女為子婦以恤其婦若孫寧福道
某在京師聞君名甫下車造廬請見不一年某歿喪
具皆君所辦治眷屬數十口淹滯踰三載君周之歸

餽之贖久之猶時寄金恤其家侯官令某以虧空干吏議倉卒登門求助君慨然諾之某獲復官然令與君實無素交也君尤篤于敬祖西郭外宗祠圯於風偕從子捐數千金新之北郭外支祠亦如之其他善事大者如增置鼇峯書院舍葺洪江鳳山橋建東街文昌祠修鼓山湧泉寺乙卯之賑飢丁丑之濟河皆倡輸千金或數千金然後集事然余見君緩急恒稱貸於人非盡有餘也而施不倦嘗語余曰吾豈以財為德哉視吾義所存而從之而已必侯有餘而後散焉則為善無日矣嗚乎此可以媿世之為士孫奮者

笑君居郎署恬澹不競長官將擢充軍機章京及寶
泉局監督皆辭於鹽務力持公正每為通商籌利弊
必綽然有便於人者遇事崎嶇窒闕衆計無所出得
君一言立解君無它嗜好飲食衣服不取華靡教子
孫以義方嘗持蔚州魏敏果公之訓曰敗家子有二
等蕩淫賭博驕奢縱佚喪祖父之貲產者敗其家門
也此愚頑不讀書之人為之妨賢病國貪賄肥家辱
祖父之名節者敗其家世也此聰明能讀書之人為
之爾曹知保貲產尤宜愛名節又嘗誦關西西銘之
語曰富貴福澤將厚吾之生使之為善也輕然則君

之所學可知已卒之日親戚相與哭於室朋友相與
泣於寢門官相與歎於府士相與嗟於學細民相與
悲於塗僉曰古之遺愛誰其嗣之余於君為同館後輩
申以婚媾獨心折君之為人去歲秋君病比隣猶相
過從其季冬余劇病幾殆君亦卧牀蓐猶相存問不
哀居無何余瘳而君竟不起嗚乎哀哉君諱龍光字
肇藻先世本色目人答失蠻氏元世祖時有思蘭不
花者佐命仗節鉞英宗時阿魯赤留鎮雲代遂為雁
門人君之遠祖也阿魯赤長子南臺侍御史薩都刺
次子江西建昌路總管野步生福建行中書省掾拔

仲禮卜居閩縣子孫以薩為氏君之始遷祖也明禮
部侍郎琦始革色目舊習持家一本朱子家禮君之
士世祖也福安學教諭位君曾祖也 封朝議大夫
謨君祖也 封朝議大夫知遇君考濠梁公也昆弟
四人君其仲也乾隆四十五年以易經魁於鄉明年
成進士選翰林院庶吉士散館改戶部授江西司蕪
山東司主事嘉慶二十有三年夏五月朔卒春秋六
十有七夫人葛氏前卒適陳氏兩林氏方氏子十五
人侍楓甲子科舉人工部營繕司員外郎崇禧增貢
生大應殤廷璵郡學生早逝皆嫡出錦城景欽並縣

學生景瀚景翹景鉞景奎景燮景著景森景淋皆庶
出女十一人孫十人嫡娶多名門以君卒之年冬十
二月某日葬西郊羣鹿山之陽與葛夫人同地禮也
前期工部來請銘銘曰

陽施夜行無翼而飛鄙寬薄敦忠信庶幾善人云喪
里春歎歎九原不作吾誰與歸

晉江學生何君暨配吳氏墓志銘

晉江何翼卿壽祺少時肄業鼇峯同朋友也不見者
二十有七年比余教授清源間訪二三故人獨翼卿
居去郭數十里卒不得一面今年夏忽以書與先人
行狀抵余曰紳索居窮巷久休廢頽念親歿四十年
乃克葬惕惕乎幾無以殫大事苟又不得其人以傳
則紳罪且益鉅而長逝者恨無終窮今適遭執事之
來幸得其人於此而不為吾親丐所以傳安可為子
紳敢以銘幽之文請無何翼卿自鄉至請益堅不獲
辭案狀何氏 國初自岑江遷埔里瘠陋為諸聚落

殿四世至翼卿之考曰璽字璞園少從父受經父以貧常授徒海外君能自刻苦忘寒餓年二十八補縣諸生屢躋場屋其後力疾赴省闈侵霖雨徒步歸道病抵家益劇君前後喪父母子穉重以貧病藥餌無所資久之知不起呼紳至牀前屬家事紳泣請曰何以治生曰愛身即活何以求書曰肯癡即博何以問業曰據案即師紳踴聽命越數日君遂卒乾隆廿九年七月二十有三日也年五十有一配吳氏自為婦時勤紡縷以度後君十二年卒皆權厝於郊嘉慶二年八月二十日乃同塋窆於十一都之許家巷山子

三朞歲貢生次某次某孫幾人朞生某縣學諸生嗟乎
自壽祺始識翼卿於鼇峯余齒未冠而翼卿方壯其
為文甚高然觀其容則愀然若有所壺鬱於中而不
能已者同學頗竊言翼卿殆顓頊專壹上也庸詎知
其累世寒微佗條之至此哉翼卿之緩葬也意固不
能以一朝安不得已而思假文字以慰泉壤所為狀
慘怛不可卒讀其志足悲也乃序而銘之曰

大之窮文將隱人之阨身遽殞葬之淹禮攸謹銘之
信義斯準是為孝終而敬盡式穀有子而名奚其泯

皇清誥授光祿大夫刑部尚書祖公墓志銘

刑部尚書浦城祖公以嘉慶十九年五月二十七日卒於京師邸第年六十踰年喪歸又明年九月將葬某原其孤瓊林以狀抵壽祺曰先君子葬有日將銘墓而難其人先君子之存也語文行輒亟稱太史太史則其人也敢以遺意請銘壽祺伏考尚書翊毗

兩朝數歷中外謨猷政治載在國史非鄉鄙所得而私也顧念公服官三十載其蕃宣之勤色養之榮任恤之仁澹泊之節史有不及詳海內蓋未之或悉不揭而襮則使公始終志行不章其曷可辭乃為之

誌且銘

誌曰公在西曹十二年總辦秋審持法平阿文成公
尤器之累偕 詔使讞獄涉江南江西廣西河南湖
南北山東為侍郎勘災畿輔鞫獄濟寧徐州安慶履
運河視洪澤湖驛傳往返無虛歲按察山西也綜覈
案牘條列小民易犯罪名曰三尺須知錄刊布於衆
俾民無誤罹法網布政湖北也湖南苗民叛大吏皆
統師出武昌省治獨公一人坐鎮並治兩府事日不
暇給秉燭治官書常達旦而白蓮教蠢動起荆襄延
鄖宜施南張甚譌言數作聞獲賊訶或得偽檄於通

衢傳警者屢矣公靜定不驚密令防禦要隘城鄉市鎮設十家牌互稽民心始帖賊稍侵孝感尋翦滅故下游五郡皆安堵 上以為功 賜花翎巡撫湖

南也察苗情規邊備宣威示信推賢任能以永綏廳孤懸不足控馭亟陳經久策請移治所以制之在陝西大兵勦餘孽公籌軍餉巡江岸置鄉勇恤災黎夙夜匪懈如楚藩時為尚書半歲值逆賊突入京城之變事定公寢不安食不甘旬日間語言蹇澀雖蒙恩優容予休養疾而公盡瘁之思未嘗一日自寬也其以勞定國如此公之除太常也

高廟數召見詢家世及親年甚悉越日授按察使當是時公二親在京師公入對

高廟謂曰汝父母未老山西甚近可即迎養及擢雲南布政使命既下復以公親老調湖北後三年丁父憂軍興

上詔公墨經視事許持服內解且

諭曰此為軍

務需人不得已權宜辦理非開在任守制例也後二年晉貳卿予假歸葬當是時公適以事左遷不踰旬而荷矜全被優渥非忠盡上契

聖心何以及此自陝西移撫廣東公以太夫人在里

請定省許之太夫人八十之前歲公豫請侍養

上曰不必俟來年冬至後朝審事畢可行矣嘉慶十
四年公至京師祝釐為太夫人恭進如意壽佛

上垂問褒嘉因命公侍宴賚予有加公抵家疏

謝云回賞臣母段匹諭令衣被恩榮謂汝母

八十三齡適朕五旬萬壽期以入都祝嘏十

載重來勉以歸里奉親百年長健蓋紀實也

上批答曰卿母福壽綿長實深忻慰日侍慈闈誠人

間第一樂也其以孝事君如此公居家營祠堂

增祀田輯祖氏遺編自始遷祖以下三十世各為詩

歌系小傳紀之。其祖無擇，龍學文集以補譜牒，訂鄉賢楊文公等遺書以存文獻。凡事繫家國利民，俗皇然亟脩廢舉，墜其以義。處鄉如此，公恒言先世家業僅供饘鬻，少應府院試，自家抵郡城二百七十里，往返皆徒步。故位躋九列，服食車馬甘儉薄，不葺園廬，不騁遊翫。歸里出則坐小輿，隘不容肱，其以約持躬如此。公諱之望，字載璜，晚字子父，號舫齋。其先當宋咸平初有官，建州者家於浦城，上湖遂為浦城人。世多通顯，曾祖伊娶葉張祖德，洽再娶皆妣氏。考率英娶吳氏，三代皆贈榮祿大夫，妣皆贈封夫人。兄弟五

人公次二娘十二月始生年十五補縣學諸生乾隆
四十二年選拔貢生舉鄉試明年成進士選庶吉士
散館改刑部主事游擢郎中為通政司參議太常寺
少卿各一按察使一布政使二巡撫四署河東河道
總督一刑部侍郎三署戶部工部侍郎各一刑部尚
書一署工部尚書一著節制紀聞洞神錄乳訓逸名
錄通言錄舫齋小言青鳳子皆山堂文鈔詩鈔凡若
千卷元配吳夫人先公三十八年卒生女一字內閣
中書金宗邵刑部尚書光悌之冢子未嫁殤繼配甯
夫人先公三十三年卒生子瓊林二品廕生兵部候

補主事武選司行走繼配陳夫人生子桂林早殤女
二婿曰內閣中書祝春熙戶部員外郎吳鼎臣之子
贊孫旭孫女三公葬本邑招賢里楓處下塢山之陽
銘曰傳巖之山上湖之水炳靈孕奇散綬鵲躡踵
皋蘇儕良鬥蒿屢寄翰屏終登鉉耳唯舌在天云如
何惺嗟茲哲人棟摧榱圯公魄則歸公忱未已世厥
忠勤將在孫子

皇清誥授通議大夫太常寺卿廣西提督學政梁公

墓系銘

太常梁公既卒之明年丙子九月將窆於福州西郭外祭酒嶺之陽其孤來請銘且曰將託是以獻史館壽祺乃謹系其世次諱官敘而銘之

叙曰公席十餘世逢掖之澤鬱久而光篤生賢雋少為學使者紀文達公所賞顏其堂曰書香世業迨入翰林習國書散館當改除金壇于相國惜其才請仍留庶吉士故公於國書最明鄉後輩經公講畫皆掇高等既丁內艱尋以父疾乞養居里十二年而

後還 朝當是時公有弟第五人侍奉非不足而公獨不忍貪祿以違其親可謂孝矣公質直好學不蹈脂常不設戟級與人交必信面規人過而人不怨自陟臺垣厯官詹所建白多詳至方楚蜀用兵累年詔臺臣極陳得失公上疏言平賊六事曰正罪名以申國法尚謀議以籌勝算設統帥以一兵權添士卒以壯軍威杜冒濫以收實用妥招撫以淨賊根上覽疏動容趣令更立法紀悉如公所畫軍政由是始肅卒所以翦除芽蘗保大定功自公發其謀也閩南奸民結鄰通兵後號曰天地會蔓延他郡肆抄掠

有司匿不聞公從鄉人訪得其實疏請飭大吏密察
掩捕獲其渠餘卹解散一方賴以安巡視南城以為
所轄六門郭外遼闊多岐徃奸慝易溷因請分邨落
定坊戶以便稽察汰冗役設鄉約以資講諭叅用保
甲法而通變之格吏議不果行後十餘年逆賊林清
搆煽營窟適在近郊乃服公之先見比於曲突徙薪
焉巡視漕務釐積痼革陋規桺僕隸復濬引河施遏
壩運道以利勘泉於盛暑中奔馳數百里雖疾不輟
上聞嘉悅之稽察旗學條上四事曰專教習則偷曠
除立多師則迪導廣增學額則勞來周修黌舍則規

撫整其他落落大者若請續修

大清會典收撫

臺灣山後噶嗎蘭皆見施舉裨國家大計公之事

君忠而能謀如此所交鄉鄙諸君子及輦下賢士大夫每從之博咨當世急務與桑梓利病汲汲以濟時為心故不為矯激沽直之行而讜論未嘗不見納於明聖也公分校鄉會試得士多知名今

東河總督九江李公鴻賓其顯也服官四十年廉約如韋布顏所居曰四知為學政黜浮詭勤考校剔弊習試期輒終日冠服坐堂皇夜分少假寐或兀坐待旦無倦容有誚公自苦者而公卒忘身盡瘁以歿嗚

乎哀哉壽祺於公為後進又與公諸從子交習見公
生平無嗜好持躬接物一出於禮蓋優為鄉人士式
公逝而典型不可復覩矣嗚乎哀哉公所著有駁閻
氏古文尚書疏證五卷駁毛氏大學證文一卷進
御詩賦一卷山左遊記一卷遼瀋遊記一卷粵西遊
記一卷詩文集十餘卷又國朝閩海人文五卷數
目通典十餘卷未完書

系曰公姓梁氏諱上國字斯儀一字九山其先福州
長樂人國初徙居省治十五世皆為郡縣諸生曾
祖澄漪祖邦柱考劍華並贈通議大夫詹事府少詹

事妣林氏贈淋人公於次四未弱冠補縣諸生乾隆三十三年與仲兄同舉於鄉四十年成進士選庶吉士散館仍留學習四十四年冬丁母憂歸服闋以父疾乞養尋丁外艱五十五年再散館授編脩分纂

國史五十七年八月分校鄉試得士林芬等十三人嘉慶二年擢山東道監察御史六年分校會試得上冉永淦等十七人是秋充會典提調巡視濟寧漕務七年秋遷工科給事中冬除內閣侍讀學士九年夏除太常寺少卿秋拜奉天府丞兼提督學政十二年內遷詹事府少詹事稽察覺羅官學十四年奉

命祭告北嶽河瀆及歷代陵寢是冬以前失察通倉
盜米累吏議十五年冬補授內閣侍讀學士十八年
夏擢太僕寺少卿秋八月提督廣西學政晉太僕寺
卿十九年晉太常寺卿明年夏五月二十八日以勞
卒於慶遠試院春秋六十有八娶許淋人山西聞喜
縣知縣崇楷女子三雲銑乙卯科舉人雲鑲附貢生
雲鏞太學生女子子三婚姻皆名門孫三堯辰 辰
拱辰

銘曰性之溫德有隅志之潔行有樞學之篤刊皮膚
言之忠安樂孟好正直天所孚發文章 帝所愉

古醇聽執其符身可滅道不渝名山峇峇謚自前儒
此吾九山先生之予廬

蔡薰秋墓誌

溫陵近以詩鳴者吾知二人焉曰王克峻君超曰蔡鴻儒薰秋余少耳君超名君超先舉於鄉後二十餘年余來清源不及見君超而見其弟鄉貢克圻君捷有志擘經恂恂若不能言者嘗以君超詩屬余刪定其詩灝瀚流轉善咏史一時傑作也既而得友於薰秋薰秋之兄慕江進士曰鴻捷余同歲生從事先儒言行學有根柢守身如處子薰秋從之受業尤善詩亦嘗屬余刪定其集其詩力洗鉛華直而不絞莊而不迂徃徃好表揚忠臣廉吏烈女節婦長歌慷慨以

發幽光亦一時雅材也顧不幸兩家兄弟皆不獲享大年君超最早逝慕江繼之君捷見余後二年尋逝兼秋遲五六年而亦逝嗚呼其可哀也君超兄弟與余無素交余尚悲之况兼秋重以孔懷朋執之誼申以文字切劘之緣其悲痛惡可勝情邪兼秋幼聰穎八九歲能背誦春秋通部不譌一字少試童子屢冠軍壯舉選拔科久躋場屋房官某嘗薦兼秋者欲為通津梁兼秋卻而謝之其志尚不苟如此孝友溫儉好撰述教子姓生徒必先行而後文然卒伸於學而絀於時豐於才而齏於命嗚呼君子亦盡其存乎

我者而已矣其存乎天與存乎人者孰能知其盈
虛消息萬有不齊之故邪夫君超數子則皆然矣蕪
秋其謂之何哉蕪秋晉江人子次四以乾隆廿年九
月二十九日生嘉慶廿二年五月十七日卒春秋四十
有六著荔桐書屋詩鈔文集詩話李氏蒙求釋註凡
十餘種配張氏生子三垂晨垂昂垂昕垂昂後慕江
女子子二孫一人垂晨等乞志墓愴然泚筆而銘之
曰
德可泚其躬而遽執鬼中才可鳴其雄而竟天楚龔
膏林桂伐嗟哉蔡生將毋同咎又奚由呵壁而問之

太空

皇清賜進士勅授文林郎湖南醴陵縣知縣 誥封

奉政大夫翰林院編修候官齊公墓志銘

余友中憲大夫齊君奉諱歸自河南卜葬歆考奉政公有日以狀乞壽祺為銘壽祺雅為中憲所善頃居里習奉奉政公之光儀而公又嘗與先太父贈大夫遊交世以薦不獲辭按狀公諱弼一字蘭皋其先自唐末入閩世為候官人考璋縣學生教授於鄉四十年有子四人公為長幼穎異未弱冠縣試冠其曹舉乾隆三十六年鄉試大興朱文正公分校會試得公卷賞之力薦不獲雋文正由是知公四十六年成進士久

之選授湖南醴陵縣知縣廉節慈惠勤於讞獄充五
十九年鄉試同考官得士謝世琛等七人調署辰州通
判苗人不靖調赴鎮筸軍營撫小鳳凰營難夷收其
戎器深入阻險大帥檄鞠被掠者他吏多欲邀功誣
為奸民駢戮率以此得善除公攘臂與爭所全活以
百數曰吾非圖陰功但持此不妄殺人之心以對天
地鬼神耳君子是以知公之仁施於後昆大而遠也
大計卓異丁外艱歸服闋終養母黃太夫人居十有
七年太夫人耄耄康強閭黨稱慕之撫孤姪如子養
寡妹終其身少極貧無憂色及家少豐而食不兼味

衣不華飾嘗述前言訓子弟曰留有餘不盡之財以
還造物留有餘不盡之福以待兒孫其志行如此中
憲少負才望以詞臣使海外不辱 君命典劇郡有
聲 天寵三錫皆公之教也嘉慶二十年二月十日
疾終里第春秋六十有三嗚乎公之歸田也齒未及
艾其乞養也太夫人亦年未及籍廼遽勇退以樂其
樂此豈世俗富貴利達之說所得侵其中者邪仕雖
未竟其用然學行足以善其躬祿養足以榮其親名
位足以張其後書所謂攸好德則錫之福者信乎當
之而無憾焉矣公以子貴累 封奉政大夫室許夫

人同邑山西聞喜縣知縣崇禎女累 封宜人子二

鯤即中憲許夫人出嘉慶年進士翰林院編修日講

起居注官 記名御史 賜一品服充冊封琉球正使

京察一等河南府知府舉卓異雖工叙績即選道員
娶許恭人廣東標豐縣知縣懿善女即許夫人之姪
也鯨邁周氏出廩膳生候選訓導娶薛氏女女子五
許夫人出者二邁葛氏出者三婿曰舉人梁雲銑國
學生陳麟書餘或許字或幼孫六人祥慶附貢生娶
郭氏刑部員外郎仁圖女次祥桐祥庚祥兆祥齡祥
松女孫五公卒之年十二月二十有二日葬南郭外

齊安梅湖山之陽禮也銘曰

求忠於孝古有善話公全令名獨履其泰宰民撫夷
勤勞課最進不貪榮退不易介世祿千鍾南陔自戒
事親之樂孰此為大門閭既高自天錫賚終焉林泉
脫彼埃壒梅湖之藏雲翳霞蔚卜云其吉繩繩黻佩

誥封朝議大夫鄭公合葬墓志銘

公諱楠字志星一字蒼林福州閩縣人也五世祖君
臨自福清始遷省治四世至廷相善治生慷慨好施
以孫貴贈朝議大夫贈公六子公其季也少沉潛好
學善事親奉庶母有禮遇兄弟女兄弟從子皆有恩
累試未售元國子監生家故素封既中落獨持介節
雖甚貧不肯稱貸於人冢子鵬程初官戶部也迎養
至京師部事兼治獄訟每退食公必詢今日訊何事
所平反輒色喜及守袁州公常勗之勤慎勿懈於校
士尤勉其精白故袁州識拔多得人公自奉甚約周恤

親族故舊若不及與人交無少長相對無情容嘉慶十五年九月十七日卒於其子素州官舍年六十以子貴封奉直大夫戶部雲南司主事晉封朝議大夫江西素州府知府夫人何氏字梅隣父崇直隸安州晉州知州夫人少明慧習書史善為詩通奕畫音律性嚴正知大義兄番禺縣丞邦彥權知數縣常使酒頽盛怒時得女弟一言立解遇事規諫恒從之其子歸也以不還事尊章為憾教子一繩以禮法乾隆五十三年六月五日先朝議公卒年四十有四有疎影軒詩集二卷誥贈宜人晉贈恭人子三鵬程乾隆

五十九年舉人嘉慶元年進士戶部山東司郎中京察一等江西袁州府知府次登謀早世次鵬嗣國子監生俱嫡出次人國選室陳氏出女二長適副榜貢生長樂陳元奎嫡出次未字庶出孫三鵬程生家駒家樹家祥女孫四以十六年冬十一月十六日辛卯合葬公與夫人於候官西郭外梅亭火峰山之陽禮也嗚乎士君子羞行錫福非獨自修之功也蓋莫不有先疇舊德之緒以裕其後昆其積累懋者其光耀益長余與袁州同朝數歲習見朝議公與人言訥訥如不出諸口而溫良樸厚之氣使游其宇者驕吝自消

素州之為人醇謹長者其在外無赫赫名及以憂去
部民爭弔賻之不能却却非慈惠廉潔習義方之教安
至是耶素州既卜日請銘於余適余亦方為先奉直
謀寃寃也慨然而為之銘曰

貧不辱貴不愆老氏之學知止足德若粟溫如玉詒
厥孫子曰有穀呂山之麓梅亭之曲是安吉藏昌以
續

皇清例 封文林郎滋國蔡先生暨室徐孺人墓志

銘

先生蔡氏諱曉字子蕙滋國其號先世自莆田徙泉州迄明累葉貴顯先生於昆弟次四性孝友父年九十餘目眇昏日坐堂上先生授徒於別榭父欲矢漚一呼輒至未嘗失躬操槭窹浣衣服如石建所為為父豫求樂邱閱八年徧陟巘嶽足重趼野宿以為常先代墳塋輒數日一往視兄弟有緩急必以身任之家徒四壁立與諸子講業至夜分不倦室中或以竈陘不煬告泊然若弗聞也質敏而志高人不售於有

司將老遂弗應試世罕有窺其學者然先生之子進士鴻捷篤守儒書信謹言行省躬思過撰著皆不戾先賢之旨選貢鴻儒東修安雅善文辭礪然不與俗俯仰非積習名教何以至是覽進士所述庭聞錄則先生之所以砥於身而繩桀於家者果不虛矣以嘉慶十八年八月二十四日卒春秋八十配徐孺人儉而甘貧勤而慈後先生半歲卒年七十有子五人長鴻烈次鴻捷四年進士早逝次鴻嶽次鴻儒六年拔貢生次鴻受孫十五人垂芝垂綿垂晨垂讀垂樹垂權垂然垂昂垂渥垂昕垂祿垂澤垂篤垂湖垂備女孫

十一人曾孫幾人以丙子月

日合葬先生與

孺人某原其孤鴻儒來請銘壽祺為進士同歲生比
交於選貢有年稔先生之家法謹為銘曰

養德恣恣而壽埒輅申處里恂恂而門齊荀陳穀於
其後而莫顯其身毋亦古所謂貴不如賤而富不如
貧者耶於戲斯先生之所以葆其光而返其真

皇清誥授光祿大夫禮部右侍郎鑑菴吳公墓碑銘
公吳氏諱烜字旭臨一字鑑菴河南固始人也先世
籍江西南昌元季遷商城明正統中有思名者再遷
是邑以輸粟二千五百石賑飢旌於朝曾孫太僕天
啓二年進士知廬州府禦寇歿贈太僕寺卿事詳江
南通志公曾祖德昌祖夢巖考延瑞乾隆三十一年進
士由戶部主事歷官廣東糧儲道權按察使嘗鞠巨
案獲其私書焚之不株連一人三世皆累贈光祿大
夫曾祖妣某氏祖妣某氏妣劉氏王氏皆累贈一品
夫人王夫人生子三仲即公生三日不啼不就乳先光

祿晝假寐夢一藍衣老嫗曰我能活汝子覺以語夫人言終而公甦公天挺淳至七歲讀祖母蕭太夫人行狀輒哽咽涕洟先光祿宦京師公昆弟布衣糲食孜孜力學年十八與兄邦治同舉順天鄉試五十二年成進士選翰林庶吉士散館國書第一授編修先光祿時已解組公念二親春秋高急歸省連丁內外艱服闋還朝六十年充貴州鄉試副考官得士費涵等四十八人嘉慶三年廷試翰詹列二等是歲充廣東鄉試正考官得士李汝謙等一百五十八人四年仁宗親政特簡公督學江西公以詞臣膺非常特達

之知位業自是始矣再遷右春坊右中允九年督湖北學三遷侍講學士十三年充武會試副總裁明年再遷詹事府詹事明年督順天學轉補通政使十七年遷兵部右侍郎明年調吏部右侍郎轉左充

經筵講官教習庶吉士明年署戶部倉場侍郎明年署工部右侍郎兼管錢法堂事公之莅湖北也長公子侍郎以編修主湖南試謁公於武昌使院公謂之曰汝太父少孤且貧嘗一日不再食厨無薪汝曾太母難園中落葉擲爲糜以啗之汝太父居約攻苦三十稔卒能以詩書起家詎子若孫然困於童子試屢矣

盖公席富貴而毋忘在莒之戒故矢精白拔單寒自
累秉文衡及教子弟終其身莫不然二十一年夏以
失察錢局匠役事免公積勞勩左脇生瘕日餌藥頽
先帝恩眷未始衰也明年次公子進士及第授修撰
是日

特旨除公中允既臚傳侍郎具疏謝
召對乾清宮

先帝詢公舊疴甚悉二十五年遷右庶子轉左秋八
月

今上御極擢侍講學士九月晉禮部右侍郎贊襄

大典夙夜惟寅道光元年夏奉

命覆勘

萬年吉地潸暑邁疾目乞假

上見侍郎

諭曰汝父病痢宜服清涼之劑安心調養俟復元乃
銷假然公踰月竟卒七月二十一日也春秋六十有
二公宗其鄉呂新吾辭文清孫夏峯湯潛菴諸先正
之學耿直光明通達治體嘗輯歷代名臣言行手錄
一帙類記往哲格言論斷以己意為家誠其大綱有
四曰治心之要曰治身之要曰治家之要曰居官之

要平生得力具在是焉與僚友士、侃廷耕與門下
士言導之以善而出以和易治家嚴雖嬰穉無敢有
嬉笑者壽祺鄉在京師荷公誘將重公沈毅及聆公
論議貞良開豁以為誠公輔才常見公子弟侍側躬
躬如畏進止不失尺寸而公於子孫一飲食一寒燠
未嘗纖悉不調護竊歎齊肅之法恭儉退讓之風誠
可為士夫則也公篤於昆弟於其仕外多資助撫從
子及孤甥如己子初先光祿建家廟置祭田又置
義田以賙同高曾以下之貧者擴墓田以食族姓
能讀書者公既貴乃建家塾擇族中之能為師者授

以經增先光祿所置祭田學田義田積六百餘石邑
子之省試及與計偕者各贐之構西悅生堂於京師宣
武門外上斜街之西偏冬以栖老病癰廢者日給飯
鹽蔬歲給絮衣人一罷斃則棺瘞之其親睦任卹類
如此獨念公遭逢

三朝恩遇異數功業未竟而遽折棟榱魂魄猶應感
戀

聖明然而公觥觥志節上下莫不諒之又况侍郎修
撰均早以文章致身為舟楫為霖雨公所未竟之緒
方於侍郎修撰乎終之公亦可以慰九泉乎娶許夫

人生子二其彥己未翰林兵部右侍郎提督順天學政其濬丁丑一甲第一名進士翰林院修撰筵李孺人生炘女二壻曰溧陽王侍郎綬之子候選通判友沂義寧尚書萬文恪公承風之子

欽賜舉人方熙孫男三侍郎生集禧正二品廕生修撰生元禧榮禧元禧從四品廕生女孫五婚娶多高門某年月日返樞故里將卜葬侍郎以壽祺同年雅故能知先德自京以書來請銘銘曰

篤於親而仁於人豐於義而明於智惟其家治光輔攸宜位與名峻福偕德晉伯踐卿槐仲天下魁鸞鳳

杞梓為國得士非公狹之孰能培之以死勤事報忠
亦至寢丘之原千里歸魂順里兮孝邨藟綿綿其後
昆

許畫山縣尹墓志銘

君許氏諱作屏字子錦一字畫山福州侯官人也累
葉文獻七世不異居乾隆中

高宗純皇帝賜

額及詩旌其閭君少穎敏而苦學年十八補縣學諸
生二十二魁鄉薦三十第乾隆五十五年進士久之
謁選為曲阜令勤於聽斷未匝月以母憂去服闋分
發奉天遼左濱海患水潦君權廣寧令值歲荒開倉
賑饑請大吏賑災民遂蘇通守岫巖州無學校歲科
試附於海蓋復三州君至則觀風試按月設課供其
飲食士咸激奮建養濟院給窮民無告者去之日民

攀輿遮道脫鞵置廳事在宣海三載撫恤灾荒甚備
君有三空堂詩謂倉空庫空獄空蓋倉庫因蠲賑而
空民不犯法獄亦空也始任承德糴貴奸商以水米
弋利為民病君聞立拘之商以賄求君陽受之而坐
堂皇斥其罪以其金為粥活灾黎君非有撥煩治勞
之才亦不能以煙視媚行悅長吏顧累試盤錯坦然
不以得喪憂喜汨其心嘗呈吏議事白需次當軸以
他吏並君請於朝

仁宗特旨予君再補承德君內無與援外逼於捷足
非忠誠固結上感宵蒼孰能以卑寮而動主知

若是乎君以吏事瘁心年未六十鬚髮皆白遽引疾歸未半載瓜代者竟褫職而君方優游廬里識者歎其退之勇而知止之智也性孝友遇族姓如已子慧者教之以成名貧不克葬者助之旅死於外者歸其喪與眷屬自為諸生好周人之急工舉業文善為詩房師錢唐吳祭酒穀人偁之有集若干卷余少與君為同社友君已舉於鄉矣及余通籍君來京師彌篤交誼嘉慶二十四年秋七月卒於里第春秋五十有九室林宜人生子二築例貢生棠保舉衍聖公府典籍廳後君弟作羹適周氏女二孫七人女孫四人曾

孫二道光三年秋八月十有二日葬君杜郭外大夫
嶺金峯山之陽其孤請銘銘曰

訐胄自宋文定堂堂本枝滋大三山世昌有明之季
玉斧挾張文采騰照偉哉甌香月溪雪邨筆海泱泱
君擅雕龍圭璧琳瑯少壯飛名拔幟詞場始仕東魯
繼官樂浪洗手奉職民以樂康十季解組家術相羊
紫籐之菴狂花半牀幅巾吟嘯樂且無央如何不弔
秋菊積芳我唱誰和獨行偃偃佳城帶嶼金峯之陽
以藏寶耀休有嘉祥

鄉貢士郊海何君墓志銘

吾鄉自宋以來學者奉朱子爲大師百世無異議然如吳才老之於尚書陳用之晉之之於禮樂黃文肅教君善之於儀禮蘇魏公之於律算鄭漁仲之於通志陳季立之於詩音黃漳浦何元子之於古易皆淵綜閎眇負千載卓絕之識庸非前賢之所亟許乎今國家經術昌明雅材宏達無不治古學以名其家者晚出則吾友郊海其人也君幼敏悟長洽聞彊識篤耆漢學其爲文博奧而廉悍於近日閭百詩臧玉林惠定宇全紹衣錢曉徵段若膺諸巨儒所著往往有

以挾其違而彌其罅覈訓故剖古今見者輒目瞠舌
橋游嶺南總督阮宮保聘君總纂廣東通志獨屬君
考古遊越中今總督陳望坡先生館之爲鉉經解及
論辨文字四卷其書成未著竹帛者有公羊精義論
語解詁孟子通義周書後定傳子後定太元經補注
未卒業者東越志姓苑鈎沈纂文摺逸若干種君篤
內行居喪三年不飲酒不食肉重氣誼寡耆好不問
家人生產廉直其天性也由閩縣學生充嘉慶三年
解福十二年舉於鄉婁困公車久之大挑用教諭道光
元年歸自武林其夏五月晦日疾翼日卒年厘四

十有七於戲以君奇傑之才沈博之學假令在康熙乾隆之初則登鴻博舉經術否亦首預四庫編摩恢恢乎奪西河之幟參東原之席矣乃迂時屯遭求恩一第而不得又不能永其年以終其述作豈天未欲海瀕慙遺一好學通古逸羣絕塵之士邪惜君者以爲過於昌黎之哀歐陽生殆相倍蓰也余僂指平生畏友在四方若張皋文許周生在里鄙若謝甸男萬虞臣先後計餘年間莫不怛化今又失吾郊海是余之無與爲質不獲以輔成其學也悲夫君何氏諱治運自曾祖以下業儒父解福秀林孝友好施君於昆弟

次仲有丈夫子五廣忠廣惠廣勲廣惠廣慇慇惠竝
殤皆繼夫人姜出也姜夫人後君一月卒前室薛夫
人初葬西郊沙堤山祖塋之次風水不貞乃卜遷以
君卒之明年閏三月朔合葬高沙後塢山之陽銘曰
函雅故通古今正文字唯學林何邵公信書淫譚六
藝默深湛究許鄭力自任老師汗小儒瘖生何促失
南金短士氣傷我心棄攫斤摧牙琴叩冥冥天難謀

清故拔貢生

勅贈內閣撰文中書

誥贈戶部貢

外郎汪先生墓志銘

先生諱中字容甫揚州江都人父一元邑增生學殖
行修尤善祿術先生七歲而孤母鄒太宜人緝屨以
食更百苦以燾其後稍長游書肆編閱經史百家過
目成誦年二十補附學生賣文為養左右服勞心毋
九流口敍萬卷鍼砭俗學疏濬古義推六經之旨以
合于世用凡古今制度沿革民生利病皆博問而切
究之其治尚書撰尚書攷異治禮溯源於荀卿賈傳
綱提條析得其會通於喪服用力最深惜未成書撰

儀禮經注正譌大戴禮記補注治小學撰爾雅補注
又撰小學說文求端羽翼蒼雅深探乎聲音訛詁之
元治春秋撰春秋述義識議超卓論者謂唐以下所
未有也國初二願輿地之學歷二百年江左莫能繼
先生于諸史地理山川阨要講畫瞭然口若懸河論
關內東吳江北淮南之形勝則有秦蠶食六國表金
陵地圖攷廣陵通典博稽三代典禮至於文字訛詁
名物象數益以金石之文成一家言為述學內外篇
依據經證實事求是為知新記又撰春秋後傳國語
正譌舊學蓄疑彊識錄藏於家其治古文詞醇茂開

懿陶冶漢晉糠粃宋後作者世所稱頌者哀鹽船文
廣陵對黃雀樓銘而其它篇雄麗大率稱是下逮詩
章書翰無所不工可謂絕特奇才矣性簡直篤於師
友披榛揀墓存卹衰門往往過於生前疾惡如風而
樂道人善辨覈古今攻瑕抵巇凌轢萬口不恕先民
何論時輩然當世通儒雅材若沈按察廷芳杭侍御
世駿鄭贊善虎文朱學士筠咸相歎賞靈學士文韶
程孝廉瑤田王巡河念孫劉教諭台拱江侍御德量
宮保儀徵公並引為講學之友嘗謁朱太傅於武林
使院依畢尚書於武昌賓館二公宏獎氣類風馳海

內有所撰述首推重之乾隆四十二年拔貢生卒年
五十有一道光十一年 旌孝子 誥贈戶部山東
司員外郎葬甘泉縣大儀鄉葉家橋西北半里孤喜
孫由鄉貢士官戶部郎博學好古能紹家業向歆彪
固今見其人壽祺生晚恨不及捧手於先生願嘗誦
讀遺文醉心卅載承戶部表墓之託泚顏泚筆而為
之銘曰

熙朝文學抗蹤鄭賈擘母六菽疇為健者奇才挺生
手為天馬龍膺虎踔騰照天下藻筆雄文盪滌喬野
位雖未昌厥聲能夏楹書在家神金在社國秀後來

是繩弓冶

大清贈太子太師謚文靖 太子少保兵部尚書閩

浙總督金匱孫公墓志銘

道光十有二年春正月己酉朔越二十有八日丁丑

太子少保兵部尚書閩浙總督金匱孫公薨於位

天子念海疆劇要遽失倚毗深軫惜之晉 贈太子

太師 賜祭葬如禮 賜謚文靖 予長子慧惇進

士次子慧翼兵部員外郎復奉 批答前疏曰曷

勝追悼之至曰已成夢幻矣天下感歎以為

君臣遭遇之間數百年所未有也逾月兩公子奔喪

至將扶匱歸葬以壽祺與公久相知請銘墓壽祺往

自武林還 京師嘗拏舟蓉湖訪公既而同在詞垣
編摩天祿跡淡而志親及持英蕩來茲土每從容諮
民俗虛懷海納言多聽從或縱論海內文章人物如
契印齒公之下交壽祺也恭壽祺之知公也亦悉於
公子之請雖不文其曷可辭按公幼讀書一目十行
背誦如瀉水舉止端重器局英亮少隨侍父巡撫公
貴州廣西官舍弱冠從王述庵侍郎邵二雲學士受
業丁外艱後游嶺南與德清許周生南海黎簡民唱
和年三十作自壽詞云但說文章能報國恐蒼蒼未
盡生才意公抱負非常不屑以文人自居於此見矣

試禮闈出大興大庾吉林三相國之門三相國門生
故舊滿天下士之四方輻湊者如入良醫之室集陳
栝之庭公又嘗為吉林公子師然進退以禮獨一無
所依附及筦閩鹽筴大府桐城汪尚書公舉主也適
有嘉定李藩伯被訐獄尚書持之急撫部不能救壽
祺謂公曰李君儒者而剛吏挫辱之必死矣公先進
諫不聽踰數日李君竟雉經公哭之慟經紀其喪歸
其孥徧告寮屬所以賻贈之甚備雖觸大府忌弗顧
也壽祺以是心服公之執義不阿不畏彊禦也通籍
翰林凡院中制詞典冊悉以委公公雖處承明而研

究朝章國政務為經世之學比擁節旄十餘載

章奏皆自屬草文檄亦多手定未嘗假之幕賓朝見
庶僚晝治官書夕攷政業又以其間綴詩筆披囊袂
百務倥傯措之餘裕每與監司守令有所謀政議未
上而牘札先四馳矣遇事可否是非一言立剖及施
之軍國靡不洞中窺會其知汀州汀介贛潮之間姦
宄攘劫為民害公治以嚴明坐堂皇鞠訟無虛日民
無羈累屢奉檄赴屬邑勘獄勘院隘奸無所容大吏
召訊連江民黃貞煌失竊致死獄與權臬使時鞠福
清革生林彌高抗糧鼓衆獄皆數言定讞衆驚以為

神其釐鹽政請復租秤以補耗折定江西引地以配
戶口分限完短課銀三十二萬有奇以紓商力商人
德之其撫安徽前後遇宿州靈璧鳳陽泗州潛山五
河霍邱水患放口糧銀二十餘萬兩緩征蠲免民甚
凍餒逃亡者赴江寧監臨鄉試途次聞潁州警密飛
檄藩司督守令營將勒獲迅速間閭安堵其撫閩稔
知延建山徑叢雜易匿莠穠寇滋多請年撥鹽庫帑
息萬兩資緝捕先後獲盜首闕春喬等戮之又飭所
屬行聯甲法迄今著為令其巡閱臺灣威立惠行禁
佔番田建鳳山城勘屯餉埔地擘畫善以周議改海

口謂廣港沙淤淺狹噶瑪蘭山峻路險負戴難行請
別設正口以五條港隸嘉義縣丞烏石港隸噶瑪蘭
頭圍縣丞通貿易疏積穀商賈皆悅而願出于其塗
其督軍事籌闢噶瑪蘭事宜凡十有四其中如番社
墾地分給民人田園不可加征減免餘租緩報升科
豁民欠錢糧及田園之水衝沙壓者存常平倉穀移
營制增隘募編保甲立族正皆撫馭之要也公最重
民食道光元年閩縣侯官穀不升即開倉平糶且招
販臺米五年十一月閩中各屬米貴豫請弛海禁募
商運浙米十數萬石其外汀州請發倉者一龍巖寧

洋德化請發倉者一永春請發倉者一二舖無匱故
歲儉而民不飢公好興水利莆田木蘭陂者初自宋
熙寧間候官李長者宏溉田四十萬畝瀕海東角遮
浪兩邨隄以石千有一百餘丈疏溝大小百七十有
八設斗門涵洞旱瀦潦洩啓閉以時久之陂圯潮灌
變膏腴為斥鹵公憂之捐廉勸輸凡縻十數萬緡遴
邑進士陳池養董其役築石壩三於荷包瀨以遏衝
沙并修溝洫及延壽陂南埗二洋咸浚復其舊歲以
有秋稔石隄為莆保障今遵浙江海塘程式造焉工
竣公大書鎮海隄三字刻石立隄側福州西湖者鑿

於晉郡守嚴高唐宋以來屢修治溉田萬餘畝國
朝康熙後凡四濟之每間四十餘年一舉頃湖墊隘
公委員履勘延鄉宦主土功周圍為石隄使永輦湖
之北梅柳橋始暢流而西北諸山之水有所鍾四野
霑渥東湖在郡城東北久湮宋蔡忠惠復五塘即其
地也鄉民願自捐貲開之公令先濟鶴嘴橋土壩口
以醺水源三月竣事溝渠頗導達矣公亟振文教捐
助鳳池書院餐錢請編臺灣粵籍生員額中一名增
廣臺鳳嘉彰四縣文童額進各二名澎湖廳文童每
試額進二名購書籍分貯海外學宮書院請以明儒

黃石齋先生從祀兩廡又鳩貳毀其全集重建貢院
號舍改五為四巷道改三為二增號舍千有餘間厚
其墻垣道皆砌石廩千餘萬緡復以餘貳重纂省志親
裁定之公尤嫻兵略其大者彰化賊李通等與粵民
黃文潤挾嫌糾衆鬥殺奸徒誘煽乘機焚掠數日延
及嘉義先是水師軍門適巡臺灣公慮臺地南土袤
千餘里重兵駐其南賊必吐窟淡水檄閩安副將邵
永福澎湖遊擊謝建雍率兵自五虎門渡八里坌疾
趨艋舺阻之調金門鎮總兵陳化成率兵渡鹿港圍
捕使賊不能遁入海公即日馳抵廈門策應又檄副

將崇福延平都司聶標文興化副將佟樞率兵赴彰化淡水而札諭戎帥嚴勒捕當是時賊氛熾蔓延月日所戕殺不下萬餘人屍相枕藉於道室廬既燬民無所歸不死則相從為盜彰化距淡水二百里間蹂躪尤甚抗拒官兵頗有所傷而我帥異懦按兵不得要領文報多不實乃姑集眾講和損失威重賊愈張無忌釀禍且益鉅於是公奏請陸路提督馬公濟移駐廈門而自率長福連羅水師千徑抵鹿港察知許蔡二帥遲延謬誤狀効罷之而議賊造謠焚掠非反叛律當以強盜論淡水以土意在報復當以械鬥

論助門者老弱單丁皆寬減鄉愚附和脅從者不株連始公至臺民懔疑必興大獄既而首戮六人皆素名兇惡於是民爭相傳謂總督止誅強盜不誅良民也餘以次按律定罪數百人旬日人心大定當是時上方出期門俠飛遣大臣前帥臺灣者率而南挾閩舊將及燕齊偏裨丞倅與俱且許其便宜調沿塗兵朝廷推轂以寄閩外慎重與征討等公已由大甲赴淡水收餘燼疊疏言北路賊平彰化難民悉歸莊舉義首自縛匪徒令以閩人捕閩粵人捕粵可省兵力而前所遣大臣者弗果來軍需不糜亂亦遄已無何

三灣番割之事起番割者漢奸能通番語與生番市竄入內山往往散髮易裘引生番潛出劫掠民常苦之三灣黃斗乃其尤暴也方淡水械鬥粵人輒有勾串番割率生番出而助殺者公決計翦除之內山險阻蒙翳蹊徑不可尋公檄諸將三路入值秋霖溪漲賊匿後山懸厓滑如飴趾不容寸諸將攀藤上擒黃斗乃等二十一人寘於法人心大快自軍興閱三月事平乃撫恤難民以北路兵單請以南路遊擊一員移駐淡水以竹塹守備一員移駐大甲是役也公履險如夷不為浮議動攝萬緒於寸心應百變於一瞬

簿牘枹鼓之間從容鎮靜酷暑中繕疏飛書揮汗立
辨籌筆徹宵鬚鬢為之頽白僕從有勸以愛惜精神
者公曰我受國恩此身豈尚為我有耶麾下聞者
莫不感奮是年冬十二月奉

命晉太子少保 賜花翎明年入 覲蒙七 召見
垂詢海疆事甚悉

上以公治事勤能且歲功速 再賜服 賜幣 予

次子候補光祿寺署正慧翼以主事即用為大吏勤

職者勸踰年 京察奉

旨議敘十有一年恭遇

皇上五旬萬壽以公年六十

特賜御扁曰錫羨巖疆

御書福壽字各一其餘 賞賚便蕃出於異數

命公子慧翼恭贄至閩蓋公負名世之資席世祿之
閩竭忠誠以奉

君國才猷什倍於儕伍故

朝廷寵顧之深超越尋常公歿而猶悼惜無已也公
自赴浙江閱兵感寒溼患瘰癧年將監臨鄉闈病劇
乃乞假醫治

上賞假兩月期滿請開缺仍 賞假一月不數日而

公遂逝春秋六十有三於戲哀哉公天性孝友規摹
閎達知人明而用之能盡其材任事勇而行之不知
其勤宅心夷白而不為硤硤之行練才敏達而不為
訑訑之聲色有黃次公扶藹之神而不矜趙張有寇
子翼文武之略而不學孫吳古之所謂孚一德宣四
方鏤景鐘而銘衛鼎者非斯人其誰與歸

系曰公諱爾準字平叔一字萊甫世為無錫人後占
籍金匱明萬秣甲戌進士第一人官吏部左侍郎贈
禮部尚書祀鄉賢諱繼皋者公七世祖也 清贈中
憲大夫江南淮徐兵備道諱仁溥者公高祖也 贈

資政大夫兵部侍郎廣西巡撫晉 贈振威將軍安徽巡撫兼提督軍門諱廷鏞者公太父也乾隆戊子舉人已丑

欽取內閣中書軍機處行走官廣西巡撫祀鄉賢諱永清者公考也乾隆六十年舉於鄉嘉慶十年第進士公之科名也 授翰林院編修充 武英殿纂修文穎館提調全唐文總纂官教習庶吉士大考二等京察一等十九年出知汀州府二十一年擢福建鹽法道二十四年授江西按察使仍調福建甫兩月遷布政使調廣東尋授安徽巡撫中途調廣東仍補安

徽道光三年調福建五年授閩浙總督六年晉太子
少保十二年 贈太子太師公之敷歷也前湖垵督糧
道通州諱錫嘏女劉夫人者公之配也乙酉舉人內
閣中書慧惇蔭生慧翼

今上賜進士與兵部主事晉員外郎者公二子也

銘曰皋颺 龔贊德義豐亮采惠疇岳牧崇梁谿清淑
鍾我公海邦砥柱旄鉞雄甘雨崇朝興岱宗陂湖當
復肥澤蒼黃雲萬頃春膏釀有時中野安磬鴻亥畚
減糶玉粒紅舳艫相望米舶通穡人雖薄釜不空往
者蝸蠻紛鬥攻鯁人龍戶成沙蟲疾馳帆艣裨瀛東

奏彈棘韜威如風扶桑出日彎天弓陸讐水慄收幪
實

天寵三錫酬厥庸勲伐榮哀垂始終後世無叛由杜
翁孰識智名與勇功公之遺愛將毋同

清勅授文林郎署福建閩縣知縣方君墓志銘

君方氏諱履錢字彥聞一字朮民先世湖州德清人
明初有錦衣衛指揮使覺亮者從蹕入燕遂為順天
人高祖康熙間翰林檢討辰幼就婚於常州徐氏因
卜居焉故今又為陽湖人而著籍大興君以嘉慶三
十三年舉於鄉父永康知州諱聯聚宦二十餘年歿
而家無餘貲君橐筆走燕趙充豫淮楚間道光六年
大挑一等來閩署永定知縣歲餘調閩縣一載暴疾
卒君善事親每晨必至牀下問安移時飯必侍側永
康愛之及仕迎養母馮宜人官舍猶然愛趙氏妹曰

吾無弟倚妹為弟篤於師友死生不渝博學於文自
天文地理氏族金石錢幣及六書九章之法梵夾之
典靡不綜貫尤酷嗜金石文字少壯行萬里所至深
山古剎必攜羶椎與俱遇殘趺斷碣隱隱有字必手
自捫拓以歸如獲拱璧足所未到必屬所知代訪所
積幾萬種多王氏金石萃編孫氏訪碑錄所未載遊
伊闕居山中彌月徧搜石刻得唐以前造像題名八
百餘種近嘗從室人脫簪珥質白銀五十兩購西湖
僧所藏碑搨本百種比郵械至君已病竟未及啓視
也詩詞外尤工駢儷文滙漢魏晉宋作者之風骨神

韻纚纚馬御風而行而陽開陰闔雲謫波詭神明矩
矱動與古會趙宋以來迄明一人而已余嘗示以黃
石齋先生駢體君醉心歎絕蓋其所詣若合符皆秘
糠齊梁以下者也著萬善花室文集六卷續集一卷
詩五卷詞一卷河內縣志三十卷武陟縣志三十卷
永定縣志二十卷伊闕石刻錄六卷富衡齋碑目六
卷希姓錄一卷泉譜一卷然君實不徒以文學顯初
試吏持已廉任事勇其宰永定時豪胡鳳兆與族人
某甲不相能殺其子刼其父棺棄深山中前令數年
弗能捕君為書諭之反覆數百言遣一役持往鳳兆

見書泣且詫曰鳳兆死矣會君勘事經其鄉徑出跪
與前自首願歸死獄吏遂論如法南鄉民許開玉殺
其族幼姪而逃緝弗獲君禱於神開玉至廈門將浮
海矣忽慟然歸徑抵縣解堂皇間負手蹣跚門吏有
識者執之一訊而服求之古循吏傳鮮有異政若斯
者也夫非忠信慈惠之格於神人而能之乎在首邑
戴星出徧謁諸上官白事日昃甫返衙齋飯接賓客
閱簿牘裁函札哺則鞠諸訟者以為常半載釐積獄
凡五百有奇上官有所諮必盡言無隱與同寮言必
誠論事必侃侃無支飾鄉人士過從必詢訪利弊所

由其夏六月久不雨米粟騰涌從大府禱于山蘭若
君體素豐數徒步烈日中焦灼晝夜不少憩中暍凡
五日易簣之際猶問天雨乎再豈所謂為民請命以
身殉之者耶然使天假之年其設施豈獨止於此耶
於戲哀哉君往與江左名流數十輩交遊最服膺者
張皋文編修李申者縣尹所最善者同年生董方立
今獨李君六十餘健在皋文年四十逝已三十年方
立年三十有三逝已九年君昔哭之神魂俱痛而君
年亦僅四十有二於戲彼世俗造物忌才之說信有
之耶韓子所謂嘲詠鬼神挑抉草木者固足傷造化

之情耶抑彫肝琢腎苦役心神於人宜易喪其生耶
雖然天能絀其命而不能絀其文能院其身而不能
院其名君之文與君之名胥有以壽於百世矣其脩
短榮枯之數又曷足爭乎哉君之喪將歸其孤踵門
乞銘余感君之相知而悲其志之不伸也為之銘曰
孰墨妙如淵雲而芝蕙之遽焚是殆諒輔之引戾訴
真宰而哀胡不聞噫嘻乎方君

勅封太孺人例晉太宜人陳太宜人祔葬墓志銘

漳州雲霄同知權守延平府青浦陸君丁太宜人憂將歸葬以狀丐銘於壽祺曰我嵩世寒畯自高祖以下皆教授自給先母之來歸也太父母春秋高季父諸姑相繼舉婚嫁家益貧母敦勸太父母遠就館而先君脩脯所入不足供甘旨母常紡苧佐之室無臧獲躬自炊汲嵩六歲時夜讀置小几依母紡輒側一燈熒熒漏三商未息母常獨精售輒倍為之無間寒暑晝夜嵩常見母手皸瘡血出卧輒呻吟骨作痛未嘗不淚潛然下也是時太母先卒然所以奉太父彌

至有所嗜必百計致之愉色婉容二十年未嘗少懈
母之貧而孝如此閭里知之也先君捐館嵩益孤苦
既就聘江陰歲寄館金止百兩二年歸母則搏節存
其半命以為先君卜葬資母之儉而能盡禮如此嵩
所不及測也嵩無兄弟始生嬰痼疾年十二未瘳母
保抱啣濡夜不交睫出入提携若神之不能離乎形
也嵩弱冠舉於鄉將與計偕母謂先君曰渠猶孩耳
乃思得官耶先君因手書潛菴語錄昔人以蚤年科
第為不幸云云張於壁示之嵩悚然不敢請行母之
慈而不徇愛如此嵩識之至今不忘也比成進士授

知縣侍母入閩權宰莆田值母年六十出廉俸金為
壽母誠毋張譙以其金製木棉衣百餘襲施貧民月
進餘錢二緡則煮粥以食獄囚後率以為常調閩縣
日讞獄母竊聽屏後夜分退息必問今日訊斷若干
有無平反訟繫多寡嵩輒悚然憫且懼也凡嵩宦跡
所至兢兢持潔勤數膺鉅任獲免咎戾皆母之訓也
母視從子如子嵩在首邑邀季父與從弟至佐家政
從弟未有子母命挈其婦來遂舉一男母大悅教孫
男女如其教子喜述先人志行及居鄉艱苦事諸孫
侍立傾聽以為樂平居不特殺不喜御新衣飫蔬筍

則加餐飯然蒿之牽繫母懷者四十餘年簞奉祿養
僅十年病亟猶諄諄念蒿官累願他日蚤退蒿毫無
以報吾親而天降鞠凶哀痛何及惟冀有傳於文辭
俾母之德行光於重泉以慰劬勞也壽祺曰太宜人
德行著乎族黨有令子善於其職母之賢益彰是宜
銘太宜人姓陳氏嘉定之紀王里人贈大夫廩貢生
二隣公之配一子我蒿即雲霄同知嘉慶十五年舉
人第道光二年進士分發福建知縣洊擢郡丞太宜
人以十一年六月三日卒於福州邸舍享壽六十有
八歸祔於其邑松浦贈大夫之塋銘曰

馬劉傳誠幼通貫兮雞鳴櫛縱謹漱盥兮酒漿遵豆
兼組纂兮祝之食報尊章衍兮弋鳧與雁莊戒旦兮
出入顧復恩勤贊兮大家東征蘭膳粢兮不疑在官
問牘判兮仁煦赤子不帛煖兮老而令終獲壽算兮
僕媪涕洟咸哀惋兮吁嗟賢母照青汗兮

皇清誥授中憲大夫廣東分巡高廉兵備道葉君墓

志銘

君葉氏諱申萬字維千一字芷汀世居閩之福清順治間遷郡城始為閩縣人考詹事毅菴先生植躬廉正再直上書房三任學政五主鄉試兩為同考官一為武會試總裁晚乃舉七子曰吾歷掌文衡所曲成士不勝數後世子孫當有興者既而諸公子各掇科名而君與同懷弟小庚郡丞伯子芸卿太守十數年間相繼登黃甲躋玉堂人咸以為清德之報也君乾隆六十年舉於鄉嘉慶十年成進士授翰林檢討

十八年典試湖南即詹事前持節地楚人榮之得士
為盛捷南宮者十餘人補山東道監察御史轉掌山
西道尋掌京畿道兼巡街道判訟牘勘市廛必躬
親之不假手胥吏諫草輒自焚故世少得聞所知者
十九年閩中東城駐防兵白晝持刃殺民於市獄久
懸君以實疏聞奉

旨逮問始獲首犯寘之法旗民由是帖然二十一年
閩藩伯李使君被訐獄興先發難者貪吏某也而讞
不及君劾之某竟罷片尋自斃網無漏焉二十三年
授廣西慶遠府知府捐廉獨修城垣質肆違禁取息

鰲賈重科收鹽數十年莫有問者君至皆裁抑之道
光二年擢高廉兵備道高涼沙田易苦旱君禱雨輒
應郡人請建亭於城東觀山顏之曰則喜修高州府
志以紀地事建梅坡書院增諸生額百餘人捐金二
千付博電兩場權子錢助膏火自是科目踵接吳川
林芾南殿撰遂魁天下蓋粵東自番禺相國後八十
餘年再盛於斯也初君所生母曾太恭人為小庾郡
丞奉以之滇比君宦嶺西南迎至官舍娛侍十餘年
代至將護送暹羅貢使入都丁內艱歸既葬君哀毀
既深羸削患舌蹇復得仲子刑部惡耗猝中風疾卒

十一年四月二十三日也春秋五十有九屬續前一日
猶貽書太守勗之勵廉隅資表率然則君之家法清
白可知已君性嚴重動必以禮雖盛暑居閤室衣冠
肅然屏謝交游友恭獨篤自奉澹泊無它好公餘手
一編輒至夜分所著有餐英集八卷配何恭人先卒
繼配馬恭人子四敬昌即太守也嘉慶二十四年進
士選庶吉士改主事軍機章京游擢至吏部考功郎
中掌文選司印出知松江府斌昌刑部奉天司主事
先卒敕昌幼殤皆何恭人出臚昌馬恭人出女子子
五長早逝次適秀水知縣陳徵芝之仲子延詮次字

編修林春溥之叔子懋熊餘未字孫二人敬昌生雲
滋斌昌生源滋女孫三以十二年六月九日葬某地
太守先期來請銘壽祺於詹事有門下淵源之誼嘗
與君同社論文又與郡丞有連又夙從諸昆季游習
知君謹按狀而銘之曰

石林文宗匠成士類七子魚魚彪怒者季世嬗雕龍
木天清秘出領銅符政平訟治毀豈性滅哀令神悴
吐掌如悲西河銜淚實此哲人終焉長寐吉有駿崇
繩是綬笥